

目次

| | | |
|-----|------|---|
| 第一 | 成吉思汗 | 二 |
| 第二 | 元世祖 | 二 |
| 第三 | 元之衰亡 | 二 |
| 第四 | 明太祖 | 二 |
| 第五 | 明成祖 | 二 |
| 第六 | 明宣宗 | 一 |
| 第七 | 于謙 | 二 |
| 第八 | 王陽明 | 一 |
| 第九 | 俺答 | 二 |
| 第十 | 宗喀巴 | 二 |
| 第十一 | 倭寇 | 二 |

授課時數

共和國新歷史教授法

第三冊 目次

——高等小學教員用(秋季)

第三冊

第二學年
第一學期

教員用

1913

第十二 滿洲之興

第十三 歐人來華

第十四 東林黨人

第十五 明思宗

二 二 一 一

時間分配方法附


每篇教授二時者、其分配方法、可分三種、(甲)每篇平分二段、每時教授一段、(乙)每篇分二段、第一段較多、第二段較少、第一時教授第一段、第二時教授第二段、并複習全篇、(丙)不分段落、第一時教授、第二時複習、其每篇教授三時以上者、以此類推、(如三時者可分二三段、四時者可分三四段、或竟不分段落、視各篇內容而定)

共和國教科書 新歷史教授法第三冊

第一 成吉思汗

本文

當南宋之世、蒙古人居於外蒙古之東部、服屬於金、其酋長、姓却特氏、數傳而至鐵木真、勢日大、遂自立、稱帝於斡難河^{在外蒙古}上、號成吉思汗、時在民國紀元前七百有六年、成吉思汗善用兵、所至莫能抗、以次翦滅諸國、奄有內外蒙古、新疆及蔥嶺以西之地、最後滅西夏、卒於六盤山^{在甘肅}、後世稱曰元太祖、子孫繼之、遂滅金、東降高麗、北服西伯利亞、南征印度、西屬俄羅斯、大破歐洲各國之聯軍、全歐震恐、至今猶以蒙古為黃種之代表、稱黃



成吉思汗攻城被箭

種曰蒙古利亞人種、

準備

- 一 寫成吉思汗攻城被箭八字於黑板、指書中圖示之曰、此意大利人馬哥孛羅遊記內所載之圖也、圖中守城者、西夏將士也、攻城者、蒙古將士、就中頭傾側、身部斜橫於馬背之上、胸間被箭者、則成吉思汗爲夏兵所射之現狀也、
- 二 我國五大民族、各有特能、就中以武勇著聞者、實推蒙古族、若能同心協力、翊贊共和、何患不爲世界之雄國、今試與汝曹述蒙古古代之成吉思汗、
- 三 現在歐力東漸、吾中華民國各民族、均大受其影響、抑知距今七百餘年、亞力西漸、實以吾華民族中之蒙古、爲之代表、我輩欲振起國威、幸勿忘此代表之成吉思汗、

教授事項

(甲)時間分配 本課分二時

第一時 當南宋之世至後世稱曰元太祖

第二時 子孫繼之至稱黃種曰蒙古利亞人種

(乙)內容提示

- 一 於成吉思汗之善用兵、遂能振興國勢、見兵力爲立國大要、汝曹欲興我民國、不可不人人勉爲軍國民、
- 二 於歐人之震懾蒙古兵威、遂推蒙古爲黃種代表、見國民以自強爲根本、能自強則有權利、有名譽、有光榮、不自強反是、

參考

〔外蒙古東部〕即喀爾喀之車臣汗部、幹難、克魯倫、二河發源處、蒙古之先、以是爲根據地、

〔服屬於金〕蒙古世奉貢於金、

〔酋長却特氏〕蒙古自却特(姓)勃端察爾(名)興、子孫蕃衍、各自爲部、舊譯却特氏爲奇渥溫氏、

〔數傳至鐵木真〕勃端察爾之九世孫、曰也速該、并合諸部、聲勢漸盛、已而生子、

將卜名、適有名鐵木眞者、爲也速該所獲、因以爲名、按鐵木眞乃精鐵之義也、
〔自立稱帝〕鐵木眞曾助金討叛酋、以功授招討使、後又擊併鄰部、益以盛強、遂稱帝、

〔斡難河〕在今車臣汗北境、源出不而罕山、東北流與克魯倫河合而入黑龍江、
〔號成吉思汗〕先是鐵木眞未起時、石上有異鳥向之鳴、聲曰成吉思、以爲瑞、及
是大會諸部、建九旂白旗、因取其音以爲號、一說成吉思汗、其義爲王中之王、
〔民國紀元前七百有六年〕卽宋寧宗之開禧二年、

〔成吉思汗善用兵〕汗深沈有大略、用兵如神、所傳訓言、多兵家精義、

〔翦滅諸國〕滅國四十、遂平西夏、其奇勳偉跡甚衆、

〔奄有各地〕內外蒙古、并滿洲在內、新疆包天山南北二路、迤及中國之西北部、
蔥嶺以西、則中央亞細亞、阿富汗斯坦、波斯之東半部、及高加索附近、

〔滅西夏〕西夏當宋寧宗時、屢爲蒙古所侵、納女請降、已而納蒙古仇人、成吉思汗自將兵征伐、城邑皆陷、夏人穿鑿土石、以避鋒鏑、免者百無一二、白骨蔽野、

夏主出降、旋被誅戮、(本元祕史)時宋理宗寶慶三年也、

〔卒於六盤山〕在今甘肅固原州西南、成吉思汗、於攻西夏時被箭、養病於此、其
後夏主親奉金佛、并金銀器皿、及男女馬駝等物來獻、汗怒不解、卒令殺之、未
幾汗卒、

〔後世稱曰元太祖〕元武宗(成吉思汗六世孫)至大二年、上成吉思汗廟號太
祖、

〔子孫繼之〕太祖卒、子窩闊台立、是爲太宗、太宗卒、子貴由立、是爲定宗、定宗卒、
從兄蒙哥立、是爲憲宗、憲宗卒、弟忽必烈立、是爲世祖、

〔滅金〕金於元太祖時屢受侵伐、喪師失地、至太宗時、汴京兩被圍、金主出走歸
德、(今河南商邱縣)金帥以城降、后妃諸王宗室男女同見虜、金主走蔡州、(

河南汝陽縣)旋爲宋及蒙古聯合軍所破、時宋理宗端平元年也、
〔東降高麗〕高麗在元太祖時、曾貢獻方物、後寢絕、元所遣趣貢使、又爲盜所殺、
太宗憲宗屢遣將伐之、高麗始降、終元之世、爲元之藩國、

〔北服西伯利亞〕當太祖興時，貝加爾湖以南，已悉爲蒙古所有，迨乃蠻諸國滅後，西部西伯利亞之地，亦漸次歸附，故北赤封地，東至俄比河，而世祖設斷事官於吉利吉思，撼合納謙州，益蘭州等處，即今葉尼賽河流域，及我國之唐努山烏梁海之地也。

〔南征印度〕太祖征西域時，已侵入印度西北之地，憲宗時，復遣諸王征之。

〔西屬俄羅斯〕俄羅斯於元太宗時，爲拔都（太祖長孫）所征服，俄境諸王，並來朝受封，定宗時，拔都又分遣俄酋，主俄國各部，歲入貢賦。

〔大破歐洲各國之聯軍〕拔都西征，歐洲之東北部，舉爲所蹂躪，今俄屬波蘭，及匈牙利均殘破，時波蘭侯亨利，集衆三萬，分五軍，第一軍爲日耳曼人（即今德國人），第二三軍爲波蘭別部人（時波蘭分四部，各有酋長），第四軍亦日耳曼人，第五軍爲亨利所自統，均大敗，亨利中矛墜騎被殺。

〔黃種〕世界人種，其初蓋同出一源，其後因所居之地，氣候不同，漸有改變，於是黃、白、黑三大種之區別，而亞細亞洲爲黃種人之地，故我國現在所有之五

大民族均係黃種

〔歐人稱黃種曰蒙古利亞人種〕歐人知黃種人之聲威，自蒙古西征始，故以蒙古爲黃種之代表，而以蒙古專名爲黃種全部分之公名，稱蒙古利亞人種，利亞譯言區域。

第二 元世祖

本文

元世祖者，成吉思汗之孫也，始建國號曰元，都燕京，號曰大都，滅宋而有其地，是時，元人所統治者，不僅中國，凡亞洲西北中三部，及歐洲東北部，幾盡歸之，爲中國史上版圖最大之時期。世祖雄心未已，南征安南占城，迫令稱臣納貢，又降緬甸，滅爪哇，海外諸國，咸來朝獻，惟征日本之師，遇颶風，船艦覆沒，不克如志。世祖志意宏遠，用人惟才，不論種族，國內宗教，亦聽人信仰自由，故其成就之事業，至爲偉大，非遼金所可及也。

準備

一 問我國古代版圖，以何時爲大，答：一曰漢，二曰東漢，三曰隋，四曰唐，今有比

此四代版圖更大者，汝曹知之乎（因書元字於黑板）

二 問中華民國人，無種族宗教之區別，其意云何？答將使之共贊共和，同謀幸福，然則距今六百五十餘年前，亦有破除此種區別者，汝曹曾聞之乎（因書元世祖三字於黑板）

教授事項

（甲）時間分配 本課分二時

第一時 元世祖者，至不克如志

第二時 世祖志意宏遠，至非遼金所可及也

（乙）內容提示

一 對於中國版圖最大時期之觀念，當知吾國民族，原有恢張國勢之能力，現在國民，宜繼續此能力，以恢張國勢。

二 對於颶風覆舟之觀念，當知船艦勢力，與國家勢力有關，兵戰則有兵艦，商戰則有商船，均不可不共謀進步。

三 對於元世祖之用人，惟才，信教自由，專制君主，尙能消除種族宗教之意見，共和國民，尤宜認明此義，不可存一偏之見，黨派之私。

參考

〔元世祖〕成吉思汗第四子拖雷之子，在位三十五年，自主中國後，傳九主，八十九年。

〔燕京〕即今北京，以爲春秋時燕國之地，故名燕京。

〔滅宋〕世祖時遣阿朮伯顏張宏範等，先後攻宋，迨至元十六年，中國之地，遂完全爲世祖所有。

〔亞洲西部數句〕均參看元疆域圖，亞洲北部，即西伯利亞也。

〔爲中國史上版圖最大之時期〕元時版圖，約佔亞洲十分之九，及歐洲之半，比漢唐最盛時，增加至二倍有奇。

〔征安南〕世祖時嘗遣使往諭安南王，被囚於獄中，後遣使令其王入覲，不奉命，世祖震怒，遣將討之，尋遣使謝罪。

〔征占城〕占城卽今安南之南部、世祖時嘗內附受封、表貢方物、已而占城嗣王補的立、負固不服、乃遣兵征之、時至元二十年、至二十一年、始奉表納款、

〔降緬甸〕世祖旣滅宋、諭緬甸使內屬、國王阿迪提耶不聽、再戰再敗、及元軍三舉、都城破、王乃乞降、至順帝時遂以其國爲邦牙宣慰司、視同內地、

〔滅爪哇〕舊作瓜哇、在占城南大海中、元右丞孟珙使其國、被黥面之辱、世祖怒、命將伐之、國王出降、已而國王所遣貢禮使潛叛去、元軍所遣護送將校爲所殺、乃俘國王并其妻子官屬百餘人、及地圖戶籍金字表以還、

〔海外諸國咸來朝獻〕世祖時馬八兒、俱藍、皆在今印度、蘇木都刺（卽今蘇門答臘）等國、皆來朝、獻方物、

〔征日本〕世祖屢遣使通日本、不納、至元十七年、元使杜世忠等爲日人所殺、乃大發兵擊日本、十八年、范文虎等率戰艦四千五百艘、自壹岐島（亦作隱岐、在日本山陰道之西與朝鮮釜山隔一海峽）東迫博多、（在日本九州島西岸福岡地方）日人拒戰甚力、元兵不能進、退依鷹島、（在福岡之南肥前西


南海中）颶風作、破舟、諸將各擇堅艦乘之遁去、棄士卒十餘萬於島、爲日本襲殺殆盡、

〔用人惟才不論種族〕元代版圖旣廣、種族繁多、世祖兼收並蓄、又重致遠人、一切色目、咸與登進、故阿剌伯、波斯、義大利、法蘭西、東羅馬之學者、軍人、藝術家等、來仕其朝者頗多、

〔宗教之信仰自由〕蒙古自建國以來、各教傳布、皆許自便、世祖雖崇信喇嘛、然於儒教道教回教天主教、皆所并重、免其差徭以示優待、

第三 元之衰亡

本文 元土宇太廣、統一爲難、乃封建子弟、歐洲東北部、以封太祖長子朮赤、亞洲中部、以封太祖次子察合台、亞洲西部、以封世祖之弟旭烈兀、其他諸王、各有封地、後遂分兩大黨、其一黨服從世祖、又一黨、則與世祖爲敵、起兵相攻、歷數十年、乃已、國勢始衰、迨中葉以後、皇室之內亂、復相繼而起、朝政日以廢弛、傳至順帝、怠荒逸樂、寵任匪人、值黃河屢決、歲饑民貧、多起爲盜、有韓山童者、自其祖



父倡白蓮會，黨徒甚盛，山童自稱宋後，集衆起兵，以紅巾爲號，四方羣雄響應，各據一隅，元人不能制，迨明太祖平定羣雄，遣師北伐，帝隨棄大都出走，

準備

一 畫元疆域圖於黑板，隨講如下：（元疆域圖解）燕京爲元代都城，其北幹難河，卽元初根據地，其東高麗，及南方之安南，占城，爪哇，緬甸，西方之西藏，均爲元所羈屬，其諸王封地，各有虛綫爲之界，

二 無論何國，均懼有爭權奪利之黨，本課言元之衰亡，其衰亡原由，卽在各黨之爭權奪利，

三 元代以極大版圖，不免內亂，不免衰亡，故凡欲免內亂，欲免衰亡，使其國勢蒸蒸日上，均當以實行統一爲要，均當以元爲前鑒，茲與汝曹縷述之，

教授事項

（甲）時間分配 本課分二時

第一時 元土宇太廣至國勢始衰

第二時 道中葉以後至帝遂棄大都出走

(乙)內容提示

- 一 於元代土宇之不能統一、遂肇衰亡之禍、是統一爲國家幸福、民國當以是爲第一政策、
- 二 於兩大黨之起兵相攻、見其非政見上之競爭、乃權利上之競爭、現在民國肇造、政見上之競爭不可無、而權利上之競爭斷不可有、
- 三 於朝政廢弛、遂爲亂黨紛起之媒、見國家不可無整齊嚴肅之政府、國民當合力監督、務使政治不蹈於廢弛之悲境、

參考

〔朮赤所封〕朮赤、太祖后孛兒帖所出、太宗之同母兄也、初孕時、后適爲蔑兒乞(蒙古別種)人所虜、生於道中、故名朮赤、蒙古語謂客也、所封地東自吉利吉思荒原、西至烏拉嶺以西、其後嗣拓地彌廣、迨及今匈牙利國境、舉多惱河下游地、及高加索以北地、悉列其版圖、稱欽察汗國、

〔察合台所封〕察合台、朮赤同母弟、所封地在錫爾河以東及天山一帶、稱察合台汗國、

〔旭烈兀所封〕旭烈兀、拖雷之子、所封地在阿母河以西、即西亞細亞一帶、稱伊兒汗國、

〔其他諸王各有封地〕太祖諸弟、及太祖太宗憲宗世祖之子孫、各受封域、除前列三人外、其著者、若太祖昆弟領滿洲之地、若太宗子孫、號窩闊台汗國、領阿爾泰山一帶、

〔國內分黨〕先是世祖之立、未得庫里爾泰之推許、(蒙古定制由諸王族諸將及蒙古所屬諸部酋長諸國君王等聯合爲大會名曰庫里爾泰、非經會中推許不得爲蒙古大汗)於是世祖少弟阿里不哥、開庫里爾泰於和林、(在今外蒙古三音諾顏部蒙古初都此)太宗定宗之後、及察合台子孫、在漠北者皆從之、旋經世祖擊平阿里不哥來歸、然太宗定宗之族、仍以世祖不遵舊制爲辭、與世祖爲敵、

〔起兵相攻〕阿里不哥之敗也、海都（太宗諸孫所封地在金山南天山北）自以太宗後當立、遂起兵、而欽察、窩闊台、察合台、三汗國之諸王、復開庫里爾泰、推海都爲蒙古大汗、惟伊兒汗旭烈兀、以世祖親弟不從、然自是海都屢擾邊、兵爭歷數十年、至武宗（世祖曾孫）時、海都之子察八兒、始以兵敗降、

〔元室內亂〕元自成宗（世祖孫）以來、帝位傳授之際、必起紛爭、權臣乘之、擅作威福、元之中央政府、勢全腐敗、

〔順帝〕武宗之孫、名妥懽帖睦爾、在位三十六年、

〔荒淫逸樂〕順帝聽番僧言、惟淫戲是樂、又製龍舟於內苑、以宮女十六人按舞、名十六天魔、

〔寵任匪人〕順帝初任伯顏、繼任托克托、及哈瑪爾、蘇蘇等、皆傾險小人、

〔黃河屢決〕順帝時、河決曹州（今山東曹州府）又決汴梁（今河南省治）決濟陰（今山東菏泽縣）復侵安山（在今江蘇碭山縣南）延及濟南（今山東省治）河間（今直隸河間縣）

〔歲饑民貧多起爲盜〕順帝自卽位以來、水旱疾疫蝗蝻之災、累歲不絕、加以物價騰踊、至數十倍、所在州縣、皆以物貨相貿易、公私所積之鈔皆不能行、而帝日事淫樂、厚斂於民、民不堪其役、遂爲饑寒所迫、相聚爲盜、

〔韓山童〕樂城（今直隸樂城縣北）人、煽動其祖父所立之白蓮會、（爲祕密會黨之一種）焚香惑衆、倡言彌勒佛降生、河南及江淮間愚民、多信之者、又有劉福通及其黨羅文素、盛文郁等附益之、

〔稱宋後起兵〕元之入主中國也、政多苛暴、故民心頗思宋、山童詭稱宋徽宗八世孫、應主中國、因刑白馬黑牛、誓告天地、謀起兵、以紅巾爲號、事洩被擒、劉福通遂反、據州郡、擁衆不下十餘萬、旋迎山童之子林兒於武安（今河南武安縣）立爲幼帝、稱小明王、國號宋、

〔羣雄響應各據一隅〕除劉福通擁戴韓氏外、蕭縣（今江蘇蕭縣西北）人李二、亦以焚香聚衆、與其黨趙均用、彭早住等攻陷徐州、羅田（今湖北羅田縣治）人徐壽輝、與僧瑩玉及鄒普勝等、攻陷蘄水（今湖北蘄水縣治）及黃州（今

湖北黃岡縣治）而台州（今浙江臨海縣治）已先有方國珍之亂，濠州（地名見前課）又有郭子興之亂，泰州（今江蘇泰興縣）又有張士誠之亂，域內糜沸，元不能復問。

〔明太祖〕在位三十一年，詳下課。

〔平定羣雄〕明太祖擊陳友諒（友諒殺壽輝自立於武昌稱漢帝）於鄱陽湖（在今江西南康府東）大敗之，友諒死，子理立，太祖遂取武昌，又執張士誠於平江（今江蘇吳縣）降方國珍於慶元（今浙江鄞縣）。

〔遣師北伐〕明太祖決攻元之策，先略山東，取河南，遂渡河北，逼大都。

〔順帝北走〕明師下通州（今直隸順天府屬）順帝集三宮后妃皇太子，議避兵北行，有以死守拒戰諫者，帝不聽，遂北去。

第四 明太祖

本文

明太祖姓朱氏，名元璋，濠州今安徽鳳陽縣人，幼孤貧，削髮爲僧，元末起兵於江北，取江南湖北諸省，號吳王，都金陵，即今南京命徐達爲大將軍，統師北伐，逐元順帝。

旋即帝位，國號明，元帝退居長城之外，擁兵圖恢復，太祖遣將攻之，內蒙古遼東皆入於明，太祖封諸子爲王，使鎮守邊要之地，太祖懲元政廢弛，治尙嚴峻，故其時朝野整肅，惟性猜忌，功臣被僇者甚衆，臣民往往以文字得禍，又定試士之法，以四書五經命題爲文，所謂八股是也。

準備

- 一 問元末歲饑民貧，而順帝逸樂自若，豈非以皇帝自皇帝，貧民自貧民，貧民固無如皇帝何乎？答曰然，然而元代國祚實卽斷送於此項貧民之手，其貧民之特起者爲誰？因寫明太祖幼孤貧六字於黑板，指示之曰，卽此爲貧民吐氣之明太祖。
- 二 問汝曹同在一校，假令校務廢弛，豈不爲人所訾議乎？答曰然，然則一國政府爲一國人民所託命，其不可使政務廢弛必矣，故明太祖特設法使之整肅。
- 三 問宋太祖以三事誡子孫，其第二事爲何？答毋殺士大夫，然而明太祖之對於士大夫，適與宋太祖成一反比例，此實明太祖之所短也，汝曹當察之。

教授事項

(甲)時間分配 本課分二時

第一時 明太祖姓朱氏至使鎮守邊要之地

第二時 太祖懲元政廢弛至所謂八股是也

(乙)內容提示

一 於明太祖之以貧民起兵、遂能北逐元帝、開有明一代國祚、足見其志氣不凡、故成就之事業偉大、

二 於明代蒙古遼東之皆入版圖、見滿蒙一帶民族、自古便聯合為一家、同受治於一政府、

三 於明太祖之整肅紀綱、見當時中央政府之鞏固、凡革新時代、不可不具此精神、

四 於功臣被慘、及臣民之以文字得禍、見專制時代人民之生命、不獲蒙法律上之保護、即言論著作之自由權、亦為專制朝廷所剝喪、可知專制之大非公

理、

五 於試士以八股、見當時聰明秀異之國民、糜費心力於瑣碎無用之文字者不少、汝曹生於今日、得講求適用之學、誠為幸福、務宜勉力、

參考

〔朱元璋〕先世家沛（今江蘇沛縣）父世珍、始徙濠州之鍾離（今安徽鳳陽縣）生四子、元璋其季也、

〔幼孤貧〕元順帝至正四年、旱蝗大饑疫、元璋時年十七、父母兄相繼歿、貧不克葬、里人劉繼祖與之地、乃克葬、即鳳陽陵也、（在今鳳陽縣西南之太平鄉）元璋於是孤無所依、

〔削髮為僧〕元璋入皇覺寺（在今鳳陽縣東南二里）元璋為帝後改名為龍興寺、為僧、逾月、游食合肥（今安徽合肥縣）越三年、復還寺、

〔起兵於江北〕元順帝至正十二年、郭子興據濠州、元璋時年二十四、入濠見子興、子興奇其狀貌、留為親兵、戰輒勝、次年、收里中兵得七百人、子興署為鎮撫、

元璋見諸帥無足與共事，乃以兵屬他將，而獨與徐達等別收民兵三千，攻取滁州（今安徽滁縣）復由滁州用計拔和州（今安徽和縣）

〔取江南北諸省〕元璋自和州渡江，襲取太平路（今安徽當塗縣）進取集慶（今江蘇江寧縣）建府治，時張士誠已先據平江，元璋東取鎮江（今江蘇丹徒縣）常州（今江蘇武進縣）遏其西侵，未幾太平爲陳友諒所拔，友諒與士誠合襲，元璋敗還江州（今江西九江府）旋走還武昌（今湖北省治）治艦東來，與元璋大戰於鄱陽湖，敗死，元璋又擊降友諒子理，湖廣江西悉平，嗣破士誠，降方國珍，兩淮兩浙皆定，又由江西徇福建，以福建舟師趨廣州，復由湖南取廣西，揚子江珠江流域之地，大致統一。

〔號吳王〕元璋之下集慶也，自稱吳國公，既破陳友諒，因即吳王位。

〔都金陵〕金陵卽元之集慶，改號應天府，元璋初都此，稱帝後因以爲國都，名曰南京（時以開封爲北京）

〔徐達〕與朱元璋同里，世業農，達少有大志，剛毅武勇，元璋之爲郭子興部帥也，

達年二十二，往從之，一見語合，屢立戰功，爲明功臣第一，封中山（今直隸定州）王。

〔受命北伐〕朱元璋以達爲征虜大將軍，與副將軍常遇春，率師二十五萬，於元至正二十七年，由淮入河而北，以次平山東河南陝西一帶，遂引兵四進，以逼大都。

〔逐元順帝〕元至正二十八年，徐達率水陸兵並進，下通州，進薄大都，元順帝宵遁，大都隨下。

〔元璋卽帝位國號明〕元璋既令徐達等北伐，其相國李善長等，率羣臣勸進，因卽帝位，國號明，時民國紀元前五百四十四年也，是爲明太祖，傳十八帝，至永曆帝見害之年，共二百九十六年。

〔元帝北行後之狀況〕元順帝自大都北行，出長城，至上都（今直隸多倫諾爾廳）旋走和林，輾轉至應昌（今內蒙古克什克騰西北捕魚兒海旁）未幾卒，〔明將北征〕元順帝走上都時，爲常遇春所破，後至應昌，其臣擴廓帖木兒，仍擁

兵犯邊，明太祖乃遣徐達、李文忠等分道北伐，達破擴廓帖木兒兵於沈兒峪，（在今甘肅安定縣北）文忠亦屢破敵，趨應昌，時順帝卒，其嗣主愛猷識里達臘戰敗北走，文忠得其嫡子后妃及諸寶物。

〔內蒙古遼東皆入明〕愛猷識里達臘自應昌北走，復稱大汗於和林，擴廓帖木兒收兵往會，數南下擾邊，徐達先敗之於土刺河，（在外蒙古）卒無功而還，愛猷識里達臘卒，子脫古思帖木兒嗣，其將納哈出侵遼東，明軍復破之於金山，（在今奉天開原縣西北）未幾，脫古思帖木兒爲其子所弑，部屬皆散，於是漠南及滿洲之地，入明版圖。

〔諸子鎮邊要地〕太祖懲元孤立，擇名城大都以封諸子，封挾爲秦王，（都西安）櫛爲晉王，（都太原）棣爲燕王，（都北平）櫛爲周王，（都開封）楨爲楚王，（都武昌）榑爲齊王，（都青州）梓爲潭王，（都長沙）檀爲魯王，（都兗州）復封椿爲蜀王，（都成都）柏爲湘王，（都荊州）桂爲代王，（都大同）模爲肅王，（都甘肅）植爲遼王，（都廣寧）後又封櫛爲慶王，（都寧夏）權爲寧王，（都大寧）榘

爲岷王，（都岷州）櫛爲谷王，（都宣府）松爲韓王，（都開原）模爲藩王，（都潞州）楹爲安王，（都平涼）桎爲唐王，（都南陽）棟爲郢王，（都安陸）榑爲伊王，（都洛陽）韓王未就藩而卒，藩王以下，皆永樂時就藩。

〔治尙嚴峻〕太祖承元末放縱之後，先正綱紀，明賞罰，臣民言事，得實封直達御前，學正教諭，不知民情者，至竄之極邊。

〔功臣被僇〕太祖時丞相胡惟庸、大將藍玉先後因反被僇，牽連諸功臣，禍及家族，死者數萬人，元勳如李善長亦賜死，其後傅友德、王弼等復無辜賜死，宿將於是有盡。

〔文字之禍〕太祖粗通文義，往往以文字疑誤殺人，杭州教授徐一夔賀表有「光天之下，天生聖人爲世作則等語，太祖覽之大怒曰：『生者僧也，以我嘗爲僧也，光則羅髮也，則字音近賊也。』遂斬之。又僧來復謝恩詩有「殊域及自慚，無德頌陶唐之句，太祖曰：『汝用殊字，是謂我歹朱也。』又言「無德頌陶唐，是謂我無德，雖欲以陶唐頌我而不能也，亦立斬。其他類此者甚夥，故當時文人多膺奇禍。」

〔試士之法〕凡子午卯酉之年，各省試士曰鄉試，丑未辰戌之年，中鄉試選者，至京師禮部試之，曰會試，中會試選者，天子親試於殿中，曰殿試，清代因之。

〔以四書五經命題為文〕鄉試會試之第一場，為四書義三題，五經義四題，四書大學、中庸、論語、孟子，是也，五經詩、書、易、禮、春秋，是也，明藝文志，有四書程文、五經程文，即當時文字之程式也。

〔八股〕應試文體裁，一為破題，言剖明題義也，二為承題，承破題之義而發明之也，三為起講，言開講題中意旨也，起講以下，通常分為八段，每一段為一股，以每兩股相對待，故俗稱此種文為八股，一曰八比，言兩相比附而成也。

第五 明成祖

本文

太祖之子曰成祖，始封燕王，鎮守北平（即燕京），太祖卒，太孫建文帝立，燕王與之爭位，以兵陷金陵，盡戮建文遺臣，遂稱帝，遷都於北平，是為北京，時元帝後裔，退居外蒙古，稱韃靼，可汗，帝勸其來歸，不聽，率師攻之，降其部落，盡破瓦剌之兵，令入貢，又招撫吉林、黑龍江，置指揮等官治之，西藏、青海，皆入貢受職。

安南本中國地，自五代後，離中國獨立，至是亦為帝所收復，成祖遣使外國，宣布威德，其一遵陸，由新疆往蔥嶺以西，其一乘海，由南洋歷印度波斯，至非洲東岸，東西諸國爭來朝貢，乘海者為太監鄭和。



明初疆域圖

世所謂三保太監下西洋也。
準備

一 畫明疆域圖於黑板、隨講如下、(明疆域圖解)濠為明太祖發祥之所、其東南金陵、為太祖所都、其北為北京、為成祖所都、即今民國之都城也、東為遼河、河以東為遼東、今奉天省境、長城外之河套、今為內蒙古鄂爾多斯旗地、韃靼今之蒙古、居外蒙古東部瓦剌、今之額魯特蒙古、居外蒙古以西及新疆北部之地、其南部之安南、為成祖時所征服、列為郡縣、今為法屬、
二 問亞力西漸、以何時期為最盛、答曰元、今有崛起於元代以後、不煩兵力、亦能使中國之威德、遠播西方者、當為汝曹述之、

教事授項

(甲)時間分配 本課分二時

第一時 太祖之子曰成祖、亦為帝所收復

第二時 成祖遣使外國、世所謂三保太監下西洋也

(乙)內容提示

一 於燕王之爭位、金陵之被陷、建文遣臣之被戮、見皇帝一位、實為肇禍之階梯、故共和國、永除茲禍本、

二 於成祖時版圖之擴張、諸國之朝貢、見國勢之強、由於兵力之裕、故兵力為國家之要具、

參考

〔成祖〕名棣、太祖第四子、在位二十二年、

〔封燕王守北平〕成祖以太祖洪武三年受封於燕、十三年、之藩北平、嘗以武略為太祖所喜、受命節制沿邊士馬、威名大振、

〔太孫建文帝立〕太祖長子標、以洪武元年、立為皇太子、二十五年卒、太祖立標之第二子允炆為皇太孫、太祖卒、因即位、是為建文帝、在位四年、

〔燕王與之爭位〕建文時、諸王以尊屬擁重兵、多不法、帝欲因事以次削除之、憚燕王強未發、乃先廢周王櫛、欲以牽制燕、於是告訐四起、湘代齊岷、皆以罪廢、

燕王遂舉兵反，以清君側爲名，時建文元年也。

〔以兵陷金陵〕燕王與建文帝兵戰，各有勝負，至建文三年，大舉南犯，由山東入江蘇，迫金陵，守將開門降，宮中火起，帝不知所終。

〔盡戮建文遺臣〕夷齊、秦、黃子澄、方孝孺、練子寧、卓敬、景清等族，牽連死者無算。

〔稱帝〕燕王入金陵，羣臣備法駕，迎謁奉天殿，卽皇帝位。

〔遷都北平〕成祖永樂元年，改北平曰順天府，以爲北京，徙富民以實之。至四年，營北京宮殿，十九年，徙都焉。

〔元裔韃靼〕成祖時，韃靼知院阿魯台奉元裔本雅失里爲可汗。

〔勸歸不聽〕成祖以書諭本雅失里，略言元氏宗祧不絕如線，去就之機，禍福由分，宜審處之。本雅失里不聽。成祖復遣使齎書往，使者見殺，成祖大怒。

〔攻降部落〕成祖先遣丘福爲征虜大將軍，帥兵十萬征韃靼，福敗沒。成祖決計親征，率衆十五萬出塞。本雅失里大懼，阿魯台東奔。成祖進至斡難河，本雅失里拒戰，大敗。阿魯台亦大敗遠遁。成祖遂班師，後阿魯台漸富強，出沒塞下爲

寇。成祖復三度親征，韃靼王子來降，阿魯台遠走，旋遣使貢馬。

〔破瓦剌〕瓦剌在喀爾喀以西，天山以北，本爲元室牧場。元末，部酋猛可帖木兒獨立，是爲瓦剌。明成祖封其酋瑪哈木等三人爲王，已而瑪哈木擁兵謀內犯。成祖親征，至忽蘭忽失溫（在故和林東）大破之。瑪哈木等遁，成祖欲窮追，聽皇太孫（卽宣宗）言而止，遂班師。瑪哈木旋貢馬。

〔吉林黑龍江〕成祖於吉林之松花江濱設置船廠，又置奴兒干都司，領衛一百八十四所，二十地面五十八，統轄吉林東部、奉天東南部及黑龍江一帶之地。

〔置指揮等官〕邊外歸附者，官其長爲都督、都指揮、指揮、千百戶、鎮撫等官，賜以冊書印記，設都司衛所。

〔西藏〕明時爲烏斯藏，洪武時曾封有國師，給玉印，又置烏斯藏都指揮司、永樂宣德中，復封番僧爲大寶法王、大乘法王、大慈法王，及闡教王、闡化王、輔教王、贊善王、護教王，凡八王，並給印誥，比歲或間歲朝貢。

〔青海〕明時爲西蕃諸衛地，洪武時設朵甘都指揮司、朵甘思宣慰司及招討司。

等、以管領之、永樂時、青海僧戒行精勤者、多授以禪師國師諸號、有加至大國師西天佛子者、悉給以印誥、許之世襲、且令歲一朝貢、青海益尊視中國、

〔安南本中國地〕安南於古爲越裳、爲交趾、又名南交、秦置象郡、漢武帝置交趾九真日南三郡、光武中興、遣吏教以耕種、制冠履、立學校、文化始興、建安（東漢獻帝年號）中、改爲交州、南北朝因之、唐初改安南都護府、安南之名自此始、

〔五代後之安南〕後梁貞明（末帝年號）中、安南爲土豪曲承美所據、自是迭相侵擾、域內屢不靖、旋爲丁部領討平、宋初上表內附、名爲藩鎮、勢同獨立、是爲外藩之始、迭經黎陳二氏、至元世祖時、遣使令入覲、不奉命、世祖震怒、發兵討之、尋遣使謝罪始免、

〔明代之收復〕明洪武中、安南陳氏、又爲黎季犛所篡、旋更號大虞、永樂四年、命張輔等率兵討之、俘黎季及犛其子、詔求陳氏後立之、無所得、爰郡縣其地、遣使由新疆往葱嶺以西、明時新疆爲瓦剌（天山北路）及元代後裔所分據、

葱嶺以西、爲撒馬爾罕（今俄屬撒瑪干）八答黑商（今英屬巴達克山）天方（今阿剌伯之麥加）墨德那（今阿剌伯內之美第那回教祖墓所在地）等數十國、永樂間、遣傅安李達陳誠等、先後通使、以次入貢、

〔南洋〕明時南洋一帶爲呂宋（今斐臘濱之北部）滿刺加（今英屬麻刺甲海峽）蘇門答刺（今荷屬大島在麻刺甲西南）柔佛（今在馬來半島與星架坡相對星加坡本亦其國土）等數十國、

〔印度〕明時印度爲榜葛刺（在今英屬東印度）錫蘭山（今英屬錫蘭爲印度東南大島）等國、

〔波斯〕明時爲忽魯謨斯（在今波斯灣地方）諸國、皆今波斯之地、

〔非洲東岸〕非洲、明史作利未亞洲、其東岸爲木骨都束、不刺哇、竹步等國、均在今埃及以南、

〔東西諸國爭來朝貢〕明時入貢之使、除南洋印度波斯非洲東岸不計外、東洋則有日本琉球（今日屬沖繩縣）等國、西歐則有拂菻（即東羅馬今土耳其

境)等國均遣使修貢、

〔鄭和〕雲南(今雲南昆明縣)人、初事成祖於藩邸、從起兵有功、累擢太監、
〔鄭和乘海〕成祖疑建文帝亡海外、欲蹤跡之、且欲耀兵異域、示中國富強、乃命
和通使西洋、將士卒二萬七千餘人、多齎金帛、造大舶、修四十四丈廣十八丈、
者六十二、徧歷諸番國、宣天子詔、因給賜其君長、不服則以武力懾之、
三保太監、三保、鄭和小字、俗傳三保太監下西洋、爲明代盛事、

第六 明宣宗

本文 成祖之孫曰宣宗、其在位也、勤於吏治、務在養民、命于謙等巡撫各省、分
任賢吏、治理地方、清軍伍、審獄囚、卹災荒、蠲重賦、時明興已六十年、人民生計漸
舒、帝又能保愛之、故卽位以後、倉庾充盈、閭閻樂業、有治平之象焉、惟安南之
失、亦在其時、先是、成祖既定安南、置爲行省、所遣官吏、悉貪暴、誅求無饜、人民苦
之、叛者屢起、久不能定、至宣宗時、官軍數敗績、帝意厭兵、遂棄安南、許其自立、從
此安南仍列於外藩、明之武功、亦自是不復競矣、

準備

- 一 人民以政府不良、受生計上之困難、於是乎有革命、惟革命以後、不良之政
府雖除、而生計之困難未解、是在人民之各勤職業、尤在政府之善爲經營、如
明宣宗、可謂盡心民事者也、
- 二 將安南與中國之關係、列表如下、(1)貢獻時代、自上古至周皆是、(2)郡縣時
代、自秦漢三國兩晉南北朝至隋唐皆是、(3)屏藩時代、自五代至宋元及明初
皆是、(4)恢復郡縣時代、自明成祖至宣宗初年皆是、

教授事項

- (甲)時間分配 本課以一時授完
- (乙)內容提示

- 一 於宣宗之愛養民人、爲種種之設備、若賢吏之分任、地方之治理、軍伍之清、
獄囚之審、災荒之卹、重賦之捐、無非民國對時之良藥、我國民不可不注意、
- 二 於安南之失之種種原因結果、則第一爲貪暴官吏之常態、第二爲武事之

參考

不可不亟講、我國民不可不注意、

〔宣宗〕名瞻基、成祖之長孫、永樂九年、立爲皇太孫、成祖卒、子仁宗高熾立、立以爲皇太子、仁宗卒、因卽位、在位十年、

〔勤於吏治二句〕宣宗卽位、卽詔內外羣臣、舉廉潔公正堪牧民者、嗣是屢汰冗官、戒貪暴、

〔于謙〕錢塘（今浙江杭縣）人、史稱其忠心義烈、與日月爭光、諡忠肅、餘詳下、

〔命于謙等巡撫各省〕宣宗時增設各部右侍郎、爲直省巡撫、謙被命巡撫河南山西、史稱其聲績表著、卓然負經世之才、同時若胡概、葉春、巡撫南畿（卽今江蘇省）浙江、周忱巡撫南畿、皆其著者、而以周忱爲尤卓卓、

〔清軍伍〕宣宗時軍伍頗缺、衛所勾軍、州縣多不以實、（無丁之家誅求不已有丁之戶行賕得免）乃命黃宗載等十五人分往直省清理之、旋定清軍例二十四條、

〔審獄囚〕宣宗留意錄囚、嘗謂百姓輕犯法、由於教化未行、命中教化、又令法司慎刑獄、

〔卹災荒〕宣宗屢下詔寬卹、而於荒政尤所注意、史稱歲不能災、（言雖有災歲民不苦饑致流離爲盜賊也）

〔蠲重賦〕宣宗嘗屢蠲逋賦、寬民間追償畜馬、免積欠薪芻、量減官田租賦、

〔明興已六十年〕明自太祖開國、歷建文帝成祖仁宗、共五十八年、迨宣宗之第二年、已滿六十年、

〔倉庾〕藏穀處所也、在邑曰倉、在野曰庾、

〔閭閻〕里外門曰閭、里中門曰閻、言人民所居之處所也、

〔成祖定安南置爲行省〕成祖以永樂五年、改安南爲交趾、設三司、（都司布政司按察司）設十五府、分轄三十六州、一百八十一縣、又設五州、直隸布政司、分轄二十九縣、其他要害、悉設衛所控制之、

〔官吏貪暴〕先是成祖既改安南爲行省、所置吏、務以寬厚輯新造、而蠻人自以

非類、數相驚恐、於是叛亂數起、其後命李彬鎮安南、中官馬騏以採辦至、大索境內珍寶、人情騷動、亂勢轉盛、

〔宣宗時官軍之敗績〕宣德（宣宗年號）時陳智方政、討安南叛酋黎利、敗績、時渠魁未平、小寇蜂起、宣宗切責智政、以王通爲征夷大將軍、帥師討利、通遇賊於應平、（交趾舊縣屬交州府）中伏軍潰、死者二三萬人、通被創走、宣宗復遣柳升沐晟會師前進、柳升師次倒馬坡、（在廣西邊外）升中鏢死、諸軍盡歿、沐晟軍至水尾、（交趾舊縣屬歸化州接雲南界）聞王通已與利議和、遂引退、賊乘之、復大敗、時宣德二年也、

〔宣宗厭兵棄安南〕王通駐師交州、（今安南之東京城）黎利圍之、通不敢出、利致書請和、上表謝罪、通遣人偕利使至京、進表及方物、未幾、復與黎利盟、詭立陳鼎爲陳氏後、並爲黎利馳上表、先是宣宗初嗣位、與楊士奇楊榮語交趾事、卽欲棄之、及是以表示廷臣、諭以罷兵息民意、乃遣使齎詔、撫諭安南人民、盡赦其罪、與之更新、令具陳氏後人之實以聞、因勅利以興滅繼絕之義、并諭通

及三司官、盡撤軍民北還、

〔許安南獨立〕王通等既北還、黎利復遣使謝恩、詭言陳鼎已卒、陳氏子孫絕、國人推利守其國、謹俟朝命、宣宗知其詐、不欲遽封利、令求陳氏後、至宣德四年、黎利遣頭目耆老至京、爲利乞封、宣宗許之、命利權署安南國事、利雖受命、然其居國、儼然稱帝、惟循例貢獻而已、

第七 于謙

本文 宣宗卒子英宗立、時瓦剌部長也先勢盛、奉韃靼可汗爲主、自稱太師、與韃靼分道入寇、英宗親禦之、師潰被虜、北京聞敗報、大震動、羣臣立英宗之弟郕王爲監國、旋卽帝位、是爲景帝、遙奉英宗爲太上皇、命于謙總各營軍馬、專理防禦之事、先是、羣臣有請遷都南京者、謙曰、京師天下根本、一動則大事去矣、乃募義勇、繕兵甲、修戰具、任用賢能、嚴備關隘、也先挾上皇爲質、進攻諸地、皆不能克、遂與明和、釋上皇歸、未幾、也先殺其主、自稱大元可汗、旋被殺、部落爲韃靼所破、其衆離散、明羣臣亦乘景帝有疾、擁上皇復辟、殺于謙、廢景帝仍爲郕王、

準備

一 問明宣宗所長安在、答長於治民、所短安在、答短於治兵、以短於治兵故、所受之損失安在、答損失安南、安南係宣宗及身所損失、更有影響及其後世者、今爲汝曹述之、

二 問宋代徽欽被虜、何以遂成偏安之局、答以高宗怯懦、遷都臨安故、然則都城爲一國根本、其不可輕議遷徙明矣、今爲汝曹言明代之于謙、

三 專制時代、無公定之法律、往往以功在一國之英雄豪傑、至爲君主所不容、不能保全其首領、此專制所常永遠杜絕之原由也、今爲汝曹言無罪被殺之于謙、

教授事項

(甲)時間分配 本課分二時

第一時 宣宗卒至釋上皇歸

第二時 未幾也先殺其主至至廢景帝仍爲郕王

(乙)內容提示

一 於英宗之師潰被虜、雖其原因甚多、而以不知預防之道、爲其總因、故對外宜早爲之防、則臨時有備、

二 於景帝之用于謙、及于謙之能禦瓦剌、見兩人均有功中國、後此之景帝被廢、于謙被殺、均爲英宗濫用君權之確證、卽爲專制政體大悖公理之確證、

三 於宋代之以遷都偏安、明代之以力守京師保全領土、足見國貴自強、不自強而爲避人之計、卽爲弱國之媒、

參考

〔英宗〕名祁鎮、宣宗長子也、立十有四年見虜、越七年復位、又八年而卒、都計前後在位共二十二年、

〔也先〕瓦剌酋瑪哈木之孫、瑪哈木卒、子脫懽嗣、脫懽卒、也先嗣、

〔奉韃靼可汗爲主二句〕脫懽嘗擊殺韃靼知院阿魯台、悉收其部、兼并他部之衆、欲自立爲可汗、衆不可、脫脫不花者、故元後韃靼長也、脫懽因與衆立之以

所併阿魯台衆歸之、自爲丞相、居漠北、至也先時、自稱太師淮王、北部皆服屬也、先脫脫不花具空名、不能相制、

〔與韃靼分道入寇〕自英宗正統初以來、瓦剌遣使入貢、太監王振以藻飾太平爲名、賞資金帛無算、已而也先以二千人貢馬、號三千、振怒其詐、令禮部按口給餼、虛報者皆不與、也先悲怒、遂誘挾諸部分道大舉入寇、脫脫不花以烏梁海寇遼東、阿剌知院寇宣府、(今直隸宣化府)并圍赤城、(今直隸赤城縣)又遣別騎寇甘肅、也先自擁衆從大同、(今山西大同縣)入、屢戰輒勝、諸邊守將俱逃匿、

〔英宗親禦也先〕時邊報日數十至、太監王振勸英宗親征、羣臣諫阻皆不聽、〔師潰〕英宗至大同、王振尙欲北行、太監郭敬密止之、始班師、道出宣府、也先兵襲軍後、後軍潰散略盡、朱勇薛綬、帥師四萬往援、次鶴兒嶺、(在今宣化縣東)全軍俱覆、次日、次土木、(在今直隸懷來縣西)日未哺、去懷來僅二十里、衆欲入保城中、振輜重未至、留待之、即駐營土木、掘井不得水、人馬饑渴、敵分道自

旁近口入、明日圍御營、也先遣使請和、英宗許之、敵佯退、王振遽令移營、回旋間、行列已亂、敵大呼、四面蹂躪入、師遂潰、

〔英宗被虜〕時英宗與親軍突圍不得出、下馬據地坐、敵擁之去、王振等皆死、官軍死傷數十萬、也先遂擁英宗由大同北行、

〔郕王監國〕郕王名祁鈺、宣宗次子、英宗即位、封郕王、英宗出征時、受命爲居守、土木敗、耗達京師、羣臣聚哭於朝、郕王奉太后命監國、

〔郕王卽帝位〕羣臣以國有長君、社稷之福、請太后立郕王以定大計、太后允之、羣臣以太后旨告王、王驚讓再三、避歸邸、羣臣復固請、會都指揮于謙使瓦剌還、口傳英宗旨、以王長且賢、令繼統以奉祭祀、王始受命、卽帝位、尊英宗爲上皇、是爲景帝、在位八年、

〔命于謙總軍馬〕景帝以謙爲兵部尙書、謙自言軍旅之事、臣請以身當之、不效、則治臣之罪、旋以謙提督各營軍馬、令諸將皆受謙節制、都指揮而下、不用命者、先斬以徇、然後奏聞、

「遷都之議」方土木變聞時、京師疲卒羸馬、不滿十萬、人情洶洶、侍講徐瑄請遷南京、于謙言欲遷者可斬、並引宋南渡事以爲戒、

「募義勇三句」謙以京營兵械且盡、特上是言、遂分兵九門、列營郭外、

「任用賢能」謙以文臣如軒輊、武臣如石亨、楊洪、柳溥、皆宜倚任、時景帝方爲監國、深納其言、

「嚴備關隘」時以楊洪鎮宣府、羅通守備居庸關、（在今直隸昌平州西北）郭登鎮大同、均忠勇稱職、

「也先挾上皇爲質二句」也先至宣府、以英宗命誘楊洪開門者三、洪皆不聽、一意堅守、後至大同、詭言奉英宗還京、總兵官郭登不納、已而挾英宗入犯京師、于謙與石亨督諸將擊卻之、

「瓦剌與明和」瓦剌屢入寇、所部兵多死傷、而脫脫不花汗、阿剌知院、又皆攜貳、于是也先遣使請和、景帝亦遣楊善等報之、

「釋上皇歸」楊善等至瓦剌、齎賜也先金幣、並勸還上皇、也先乃引善見上皇、設

宴奉饌、也先自彈琵琶、妻妾奉酒、知院伯顏等亦各設餞畢、也先築土臺、坐上皇臺上、率妻妾部長羅拜其下、上皇行、也先送數十里、遺其頭目七十人送至京、

「也先殺其主」也先與脫脫不花內相猜、脫脫不花妻、也先姊也、也先欲立其婦子爲太子、不從、也先亦疑其通中國、將謀已、遂治兵相攻、脫脫不花敗走、也先追殺之、時景帝景泰二年也、

「自稱大元可汗」也先既殺脫脫不花、至景泰四年、遂自立爲可汗、以其次子爲太師、致朝廷書稱大元田盛可汗、末曰添元元年、田盛猶言天子也、

「也先被殺」也先恃強日驕、荒於酒色、至景泰六年、爲阿剌知院所攻、遂被殺、（部落爲韃靼所破）也先被殺後、韃靼部長孛來、復殺阿剌、奪也先母妻、并其玉璽、也先諸子及弟姪等、部屬分散、

「明羣臣擁上皇復辟」景帝以景泰七年十二月有疾、至明年正月、石亨、徐有貞等、以立太子不如復上皇、可邀功賞、遂以兵迎上皇于南宮、遂復位、言復辟者、

辟君也言還居君位也。

〔殺于謙〕先是徐有貞、石亨等既定議迎復，有貞、石亨等中變，乃於次日詭辭以激亨曰：于謙等已遣人迎襄王（仁宗第五子）矣。亨懼，謀遂決。及英宗復辟，草詔諭羣臣，于謙甫聽宣諭畢，即被執下獄，旋以謀逆律定讞，坐極刑。奏上，英宗猶豫未忍，曰：于謙實有功，有貞曰：不殺謙，此舉為無名，乃棄于謙市，籍其家，家屬戍邊。

〔廢景帝仍為郕王〕英宗以太后制，言庶次子郕王祁鈺，性本梟雄，過攝天位，神人共怒。云云。遂廢祁鈺仍為郕王。至憲宗（英宗子）時，追念其功，始諡為恭仁康定景皇帝。

第八 王陽明

本文 英宗之曾孫，是為武宗，瞻近羣小，自稱威武大將軍，巡遊南北，流連忘返。寧王謀奪其位，叛於南昌。（今江西）王守仁平之。王守仁，餘姚（在浙江）人，好講學，世稱陽明先生。嘗諫武宗被杖，謫為貴州龍場驛丞。龍場在萬山中，其民皆苗族，守

仁因俗化導，苗人喜相率

伐木為屋，以棲守仁。守

仁之學，宗孔子、孟子，孟子

有良知良能之說，守仁昌

明其理，謂人人皆有良知，

人人皆可為聖人，士無賢

愚，為其言所感動，爭信從

其道，謂之陽明學派。與朱

子學派相對峙。

準備

一 書王陽明像四字於黑板，指示之曰：此像自王陽明全集中摹出，陽明以功贈新建（今江西新建縣）伯，其冠即當時伯爵之冠，七梁籠巾，冠上為綬，手中所持為當時所用之笏。



王陽明像

二 問明代以書生立戰功，汝曹所已知者何人，答于謙，今有戰功不讓于謙，而其學術之有功於人，尤爲偉大，汝曹知之乎，因指書中像語之曰，即陽明先生是也。

教授事項

(甲) 時間分配 本課以一時授完

(乙) 內容提示

- 一 於武宗之巡遊忘反，見當時君主，祇有游樂上之觀念，並無政治上之思想，如是而尙尸政權，是爲專制之劇毒。
- 二 於陽明之因俗化導，澤及苗人，見世界民族，無一不可教之人，民國謀教育之普及，當以陽明爲模範。
- 三 於人人皆有良知，人人皆可爲聖人，見學子之不可自棄，汝曹求學，均宜以最高之人格自待，庶可告無罪於陽明。

參考

〔武宗〕名厚照，英宗之曾孫，英宗卒，子憲宗見深立，憲宗卒，子孝宗祐樞立，孝宗卒，子厚照立，是爲武宗，在位十六年。

〔暱近羣小〕武宗時，太監馬永成谷大用劉瑾等，造作巧僞，淫蕩上心，擊毬走馬，放鷹逐犬，俳優雜劇，錯陳于前，至尊萬乘，與外人交易，狎暱嫖褻，無復禮體，日遊不足，夜以繼之，其閹黨若焦芳劉宇張綏曹元等，並以佞邪預機務。

〔自稱威武大將軍〕武宗於正德十二年，自稱總督軍務威武大將軍總兵官，嗣又詭稱姓名爲朱壽，加封鎮國公，已而又自加太師。

〔巡遊南北〕武宗聽信江彬言，宣府樂工多美婦人，屢至宣府，又假親征寧王爲名，統兵南遊，至南京，班師至清江浦，（在今江蘇清河縣）幸太監張陽第，踰三日，自泛小舟，漁于積水池，舟覆溺焉，左右挾之出，自是遂不豫。

〔寧王之叛〕太祖第十七子權，初封寧王，國大寧，（今山西大寧縣）永樂時，改封南昌，傳至五世孫宸濠，陰蓄異志，交通肘腋，因帝無儲嗣，遊幸不時，人情危懼，遂日夕覬覦，以正德十四年起兵反，殺江西巡撫按察司等，略九江南康皆陷。

之、

〔王守仁平寧王〕時守仁方以都御史巡撫南贛汀漳、（今江西之南安贛州福建之汀州漳州）奉命勦福建叛軍、行至豐城（今江西豐城縣）聞寧王反、因起兵討之、直搗南昌、遂擒寧王於樵舍（在今江西新建縣西北）南康九江亦下、

〔餘姚〕今浙江餘姚縣、

〔好講學〕守仁天姿異敏、自幼便以聖賢爲志、嘗泛濫於佛老二氏之學、數年無所得、後乃悟格物致知之要、所至喜論學、

〔陽明〕守仁嘗築屋于陽明洞中、（在今浙江紹興縣東南洞天福地記第十洞會稽山名陽明洞天）學者因其所居而名之、

〔諫武宗被杖〕武宗爲劉瑾所惑、逮御史戴銑等二十餘人、守仁抗章救、瑾怒、廷杖四十、

〔龍場驛〕在今貴州修文縣治、

〔苗人伐木爲屋〕守仁初至龍場、其地皆苗人、言語不通、無居舍、就石穴而處、始教之範土架木爲茨（草舍也）居龍久之、苗人皆親守仁、共伐木爲構、龍岡書院（在今修文縣治）君子亭、何陋軒（均在龍岡書院內）玩易窩（在修文縣北陽明洞穴山麓爲之、讀易於此）

〔良知良能〕孟子曰、人之所不學而能者、其良能也、所不慮而知者、其良知也、言親親敬長、出於天性之自然、不假外求也、

〔昌明良知之理〕守仁言良知只是個是非之心、是非只是個好惡、只好惡就盡了是非、只是非就盡了萬事萬變、

〔人人皆有良知二句〕守仁言聖人亦是學知、衆人亦是生知、問曰何如、曰這良知人人皆有、聖人只是保全、無些障礙、兢兢業業、自然不息、便也是學、只是生的分數多、所以謂之生知、衆人自孩提之童、莫不完具此知、只是障礙多、然本體之知、自難泯息、雖問學克治、也只憑他、只是學的分數多、所以謂之學知、

〔陽明學派與朱子學派相對峙〕朱子學派、注重格物、言窮極事物之理、而吾心

之全體大用無不明、陽明學派、注重良知、言能擴充固有之良知、自能推盡事物之理。

第九 俺答

本文 自也先死後、韃靼復立可汗、世稱小王子、屢入貢於明、然擾邊無虛歲、其後、徙慕東方、俺答者、小王子之從父也、據河套、善用兵、爲諸部長、時明武宗卒、從弟世宗在位、俺答寇掠不絕、宰相夏言、請恢復河套、帝信嚴嵩之讒、殺夏言、嚴嵩益專權、楊繼盛上疏劾之、反爲嵩所構、下獄死、世宗卒、子穆宗繼立、張居正爲相、整飭吏治、任用賢將、邊備甚嚴、俺答亦年老、遣使請和、乃封爲順義王、蒙古諸部皆納款、邊塞由此寧謐、俺答死、其妻三娘子、爲部衆所服、事明尤謹、封忠順夫人。

準備

一 掛輿圖一幅、指河套一部分語之曰、此爲黃河三面迴環之區域、屬內蒙古之鄂爾多斯旗、爲中華民國領土、此地淺草平沙、可耕可牧、從前中國與他族

之競爭、多以此爲盛衰之關係、謂余不信、試觀本課所述之俺答、

二 問此地以何時代入中國版圖、答秦始皇時代、彼時稱爲何地、答河南之地、漢武帝時代爲何地、答朔方郡、然則中國之開闢斯土、由來久矣、明時爲韃靼所據、今爲汝曹述建言恢復之夏言（因書夏言二字於黑板）及讒殺夏言之嚴嵩（因書嚴嵩二字於黑板）

三 吏治不飭、則無以安內、邊備不嚴、則無以禦外、二者均爲現時民國之要策、今爲汝曹述內飭吏治、外嚴邊備、可爲民國師範之張居正、

教授事項

（甲）時間分配 本課分二時

第一時 也先死後至下獄死

第二時 世宗卒至封忠順夫人

（乙）內容提示

一 於俺答之據有河套、中國之屢遭寇掠、見領土之不可不竭力保全、

- 二 於嚴嵩之讒殺夏言，構死楊繼盛，見小人之不可使柄國。
- 三 於張居正之整飭吏治，任用賢將，遂致俺答請和，邊塞寧謐，見吏治之不可不端，任將之不可不擇。

參考

「小王子」韃靼部長孛來，立脫脫不花子麻兒可兒爲可汗，號小王子，其相繼爲汗者，遂沿稱小王子。

「屢入貢於明」孛來每歲入貢，孛來後爲毛里孩所殺，毛里孩遣使入貢，其別部長亦遣人來朝，滿魯都爲可汗，數遣使朝貢，滿都魯後，小王子自稱大元大可汗，奉書求貢，明廷允之，與伯顏猛可王等屢入貢。

「擾邊無虛歲」韃靼以殺掠爲生計，一方修貢，一方寇邊，自英宗復辟，迄穆宗之初，百餘年間，沿邊一帶，歲受騷擾。

「徙慕東方」韃靼自達延嗣爲汗，統一諸部，自號大元大可汗，分其屬土爲二，以「徙慕東方」，王諸子，末子札賚爾，領漠北蒙古，二子巴爾色，統漠南蒙古之西半，達延死，長

孫卜赤嗣爲汗，傳其子達賚遜，遂東徙宣府之北，世嗣汗位，專轄漠南東半，稱插漢兒部（即今察哈爾）。

「俺答」巴爾色之弟，於小王子卜赤汗爲從父行，據河套，雄黠喜兵，爲諸部長，相率躡諸邊。

「世宗」名厚燠，憲宗之孫，武宗之從弟，嗣爲興王，國於安陸（今湖北安陸府）武宗卒，無子，入卽位，在位四十五年。

「俺答寇掠不絕」俺答於世宗時，屢入寇擾，邊將多畏縮，諸鎮士卒多通寇，遇偵者賂求不殺，彼此譯語，互爲和同，亡命或爲之鄉導，非時倏至，冒險深入，如履故途。

「夏言」貴溪（今江西貴溪縣）人，性警敏，善屬文，居言路時，以謬謬稱，以世宗嘉靖十五年，爲武英殿大學士，預機務。

「請復河套」先是嘉靖二十五年，以曾銑總督三邊（延綏甘肅寧夏今陝西延安府綏德州及甘肅甘州肅州寧夏三府地）軍務，建言復河套，條八議，夏言

主之、因密荐銑、謂羣臣無如銑忠者、銑鳩兵繕塞、輒破敵、帝亦頗嚮之、令言擬旨優獎者再、銑喜、益銳志出師、條上方略、廷議一如銑言、

〔嚴嵩〕分宜（今江西分宜縣）人、入明史姦臣傳、

〔讒殺夏言〕世宗既是曾銑復套議、忽中變、降旨詰責、嚴嵩素與夏言有隙、至是遂極言河套必不可復、廷臣亦盡反前議、如嵩說、嵩乃力攻言、奪官致仕、曾銑旋被殺、言亦棄市、

〔嚴嵩益專權〕世宗酷信道教、居西苑、大臣希得進見、惟嵩獨承顧問、御札一日或數下、雖同列不獲聞、以故嵩得逞志、徧引私人居要地、士大夫奔走輻輳、皆惴惴事嵩、

〔楊繼盛〕容城（今直隸容城縣）人、七歲失母、庶母妬、使牧牛、繼盛經里塾、觀里中兒讀書、心好之、因語兄請得從塾師學、後成進士、官至兵部員外郎、世稱椒山先生、

〔劾嚴嵩〕繼盛劾嵩十大罪五奸、

〔構殺楊繼盛〕繼盛疏中有召問景裕二王語、景王載堦、世宗第四子、裕王載屋、世宗第三子也、嵩見此語、謂可指此爲罪、密構于世宗、世宗大怒、下繼盛詔獄、詰何故引二王、繼盛曰、非二王、誰不憚嵩者、獄上、杖之百、移刑部定罪、繫獄三載、世宗尙無意殺之、已而有爲營救于嵩者、嵩黨誅之曰、公不觀養虎者邪、將自貽患、嵩領之、遂坐繼盛大辟、棄西市、

〔穆宗〕卽裕王載屋、在位六年、

〔張居正〕江陵（今湖北江陵縣）人、以穆宗隆慶元年、爲吏部侍郎、兼東閣大學士、預機務、至神宗（穆宗子）時爲首輔、相業爲有明一代之冠、都計前後在相位、共十有七年、

〔整飭吏治〕如立章奏考成法、（凡章奏勘覆立以限期逾限者罪之）內外官行久任法、嚴治諱盜折收漕糧之類皆是、

〔任用賢將〕時以王崇古總督三邊（後又總督宣大）戚繼光鎮薊州、（今直隸薊州）李成梁總兵遼東（今奉天省遼河以東地）均以能將名、迨居正爲首

相時、尤信任之、而以王崇古入理京營、方達時總督宣大、

〔俺答請和〕俺答於穆宗初年、尙大掠山西、已而奪其孫把漢那吉婦、把漢憤甚、來歸、俺答執叛人趙全等與明、以易把漢、把漢歸、俺答及其妻撫之泣、遣使報謝、誓不犯大同、乞封請互市、乃封爲順義王、

〔蒙古諸部皆納款〕俺答既受封、又封其弟侄子孫及諸壻有差、俺答約束羣部無入犯、歲來貢市、西塞以寧、

〔三娘子〕本俺答之外孫女、俺答孫把漢所聘之婦、俺答奪之以爲妻、俺答卒、子黃台吉立、黃台吉卒、子攘力克立、皆封順義王、三娘子歷配三王、主兵柄、爲中國守邊保塞、衆畏服之、乃勅封爲忠順夫人、自宣（今直隸宣化縣）大（今山西大同縣）至甘肅、不用兵者二十年、

第十 宗喀巴

本文 俺答之附於明也、爲達賴喇嘛勸化之力、先是元朝敬信西藏佛教、奉喇嘛爲帝師、明太祖卽位、西藏歸附、太祖封帝師之後爲國師、使化導人民爲善、成

祖宣宗尤加崇敬、封法王者三人、其西藏青海之喇嘛、受封國師禪師者尤衆、皆許其世襲、喇嘛卽僧徒之謂也、當元明時、皆戴紅帽、謂之紅教喇嘛、勢力甚盛、

後多放縱、不能守佛教規則、僧人宗喀巴、毅然改革紅教、以清淨守法爲主、四方爭趨仰之、其徒皆戴黃帽、謂之黃教喇嘛、自是紅教衰而黃教興、宗喀巴有大弟子二人、

長曰達賴喇嘛、次曰班禪喇嘛、達賴駐前藏、班禪駐後藏、皆世世襲職、爲西藏青海蒙古所信仰、稱曰活佛、達賴喇嘛致書張居正、求通貢、并勸俺答戒殺、俺答遂與明和、息兵安民、建寺曰仰華、虔

修佛法、

準備

一 書宗喀巴三字於黑板、指書中像示之曰、此像爲喇嘛教徒所尊奉、實喇嘛教之改良家、其所坐之座作蓮花狀者、卽喇嘛坐床、兩足掌向上爲趺坐、雙手合掌、謂之合十、旁爲供養之香花、



宗喀巴像

二 宗教家能勸人爲善，即爲功德，若藉宗教之權力，妄有作爲，即爲罪惡，因指書中像示之曰，即爲此人之罪人。

三 世界上人類相殺，實爲野蠻之尤，有能化此野蠻之習性，使之歸於親愛者，方爲不背人道，因指書中像示之曰，方爲此人之契友。

教授事項

(甲) 時間分配 本課分二時

第一時 俺答之附於明也，至自是紅教衰而黃教興

第二時 宗喀巴有大弟子二人，至虔修佛法

(乙) 內容提示

一 於明太祖之封國師，原使之化導人民，則化導人民，實爲刺麻之天職，彼藉教權以賊害人民者，不但爲國民公敵，亦當爲世界所不容。

二 於紅教之衰於放縱，黃教之興於清淨，見無論爲何宗教，均當恪守教規，共謀國福。

三 以殺掠無厭之俺答，受化刺麻，即能化慘毒爲和平，見天下無不可化之人，故民國約法上，特許國民有宗教信仰之自由權。

參考

〔達賴刺麻〕刺麻，藏語以稱僧徒，見西藏圖考，華言無上，達賴刺麻，爲刺麻之教主，其詳見下。

〔西藏佛教〕佛教本起於印度，唐太宗之世，吐蕃王棄宗弄贊據西藏，太宗以文成公主妻之，公主攜帶唐土經像入藏，同時棄宗弄贊，又娶白布國王（今布丹國在西藏南）之女爲妾，白布王女亦攜帶印度經像入藏，吐蕃王敬奉之，西藏遂爲佛教國。

〔元奉刺麻爲帝師〕元世祖封藏僧八思巴爲帝師，令領天下釋教，刺麻教由此益盛。

〔明封帝師後爲國師〕太祖既定中國，因藏人俗尚，用僧徒化導爲善，乃遣使廣行招諭，於是攝帝師喃加丹藏卜，先遣使朝貢，太祖喜，賜紅綺禪衣，已而親入

朝太祖封爲熾盛佛寶國師，於是元帝師八思巴之後嗣及烏斯藏大刺麻，先後遣使來朝請封號，詔授帝師，後爲大國師，餘爲國師。

〔封法王〕三成祖時，烏斯藏僧哈立麻者，以有道術爲國人所稱，永樂四年來朝，封大寶法王，同時有僧昆澤思巴，以十一年入朝，封大乘法王，而釋迦也失，復於次年入朝，禮亞大乘法王，逮宣宗宣德九年，亦受封爲大慈法王。

〔西藏青海之刺麻二句〕初太祖招徠番僧，本藉以化愚俗，弭邊患，授國師大國師者，不過四五人，至成祖兼崇其教，自闡化等五王（闡化王吉刺思巴監藏贊善王著思巴兒監藏闡教王眞巴兒吉監藏輔教王南渴烈思巴護教王宗巴幹）及二法王（見上）外，授西天佛子者二，灌頂大國師者九，灌頂國師者十有八，其他禪師僧官，不可悉數。

〔世襲〕太祖以西番地曠人悍，欲殺其勢而分其力，故元代法王國師後人來朝貢者，輒因其故俗許世襲，永樂間成祖以哈立麻有道術，迎至京師，厥後僧徒歲集，封授寔多，法王國師等既死，其徒輒自相承襲。

〔紅教刺麻〕佛教入藏後，沿印度舊俗，冠紅冠，所衣袈裟皆紅色，原無紅教名稱，自宗喀巴後，始名此項衣紅僧徒爲紅教刺麻。

〔後多放縱二句〕紅教娶妻生子，傳衣鉢，專恃密呪，流弊至以吞刀吐火炫俗，無異師巫，盡失戒定慧宗旨（楞嚴經云：攝心爲戒，因戒生定，因定生慧），又經元明帝室之崇奉，頗涉侈汰，番衆愚惑，多淪苦海。

〔宗喀巴〕西寧（今甘肅西寧府）人也，一名羅卜藏札克巴，生於永樂十五年，爲刺麻教之宗教革命家。

〔改革紅教〕宗喀巴初學經於薩迦（紅教刺麻廟），後深觀時數，當改立教，其教重見性度生，斥小乘（佛教深淺之階級謂之乘，有最上乘大乘小乘之別）及幻術下乘（即紅教中吞刀吐火及禁呪之屬）。

〔四方趨仰〕自宗喀巴之說大興，紅教諸法王皆俛首稱弟子，化行諸部，東西數萬里咸崇仰之。

〔黃教刺麻〕宗喀巴會衆，自黃其衣冠，因以衣黃之僧徒爲黃教刺麻。

「大弟子」言弟子中之高等者也。

「達賴刺麻」名根登珠巴，後藏霞堆（地未詳）人，後至前藏，經宗喀巴收爲大弟子，授以班墊神母各經，是爲達賴刺麻第一輩。

「班禪刺麻」名凱珠巴格勒克，後藏拉堆（地未詳）人，與達賴刺麻同，至前藏噶勒丹寺，經宗喀巴收爲大弟子，是爲班禪刺麻第一輩。

「分駐前後藏」前藏都會曰拉薩，拉薩城之北，北山之南五里許，平地特起一石峯，周五里有奇，萬千餘尺，是名布達刺，即普陀也。因山築樓十三層，金碧輝煌，爲達賴刺麻坐床之所。後藏都會曰日喀則，有大寺曰札什倫布，爲班禪刺麻坐床之所。

「世世襲職稱活佛」宗喀巴遺囑二大弟子，世以呼畢勒罕轉生，呼畢勒罕者，華言化身也。死時不失其真，自知其往生，其弟子輒迎而立之，傳襲其職，言活佛者，謂佛雖老去，而其元神及生命，乃常展轉托生也。

「達賴刺麻致書張居正」張居正時，爲達賴刺麻第三輩，名鎖南嘉穆錯，在前藏

堆噶（地未詳）轉世，俺答自領萬人迎至青海，改良蒙古習俗，創立善福規條，衆蒙古上以徽號，其後各部落復迎，至鄂爾多斯地，坐禪三月，先是俺答勸達賴通中國，至是乃遣張居正書，自稱釋迦牟尼比邱。

「勸俺答戒殺」俺答西征，收服諸部落，迎達賴，達賴爲俺答及大衆，各言其前世三生善緣，於是衆台吉等奏言，今屢世戰鬪之餘，值聖刺麻與大力汗（指俺答）遇，伏願自今將湧血之大江，變爲溢乳之靜海，普遍衆生，無有窮極，蓋不獨俺答深受其戒也。

「仰華寺」取景仰中華之義。

第十一 倭寇

本文 明世宗時，東南又有倭寇，先是日本西部之人，當明太祖之世，已爲寇於中國，太祖命將防之，成祖卽位，日本大將軍遣使入貢，帝封爲日本王，令其嚴捕倭寇，沿海稍安。至世宗時，倭寇又熾，倭寇所至肆焚掠，又有內地奸人爲之導，江蘇浙江福建廣東，皆被其禍，居民死者甚衆，後爲戚繼光俞大猷諸將所破，至

穆宗時倭寇始平。穆宗卒，子神宗即位。日本大臣平秀吉勢正強，乘朝鮮微弱，發兵攻之，蹂躪其全國。神宗命將赴援，爲日本所敗，乃遣使封秀吉爲日本王。然日本兵猶不退，相持久之，迨秀吉死，始各解兵，準備。

一 寫倭寇上陸四字於黑板，隨示之曰：此圖自日本歷史中摹出，其首先擁旗者一人，旗上所



倭寇上陸

書之八幡大菩薩，爲彼中所崇信之神名，其次爲寇酋，以手指揮，作進行狀，餘爲隨從之盜夥，各以倭刀爲利器。

二 問汝曹現有所衣之衣，所食之食，所用之書籍及什物，設不幸而爲人所寇掠，於心安乎？答不安，再如不幸，汝曹兄弟中，出有劇盜，掠人所衣之衣，所食之食，所用之書籍及什物，於心安乎？答不安，然則吾爲汝曹言寇。

三 世界人類之不幸者莫如寇，寇在國內，則爲國民之害，寇在國外，則爲國民之差，今爲汝曹述爲中國害爲日本羞之倭寇。

教授事項

(甲)時間分配 本課分二時

第一時 明世宗時至倭寇始平

第二時 穆宗卒至始各解兵

(乙)內容提示

一 於明將之防，日人之捕，見寇盜爲人類公敵。

- 二 於倭寇之所至焚掠、有內地奸人爲之導、此類奸人、不自愛其同胞、至引外寇以流同胞之血、尤無人道、爲吾人所共疾、
- 三 於賊繼光俞大猷之破賊、見吾國人具有殺敵之能力、要在施教教育以化除奸人、精甄別以任用賢將、自無不揚之國威、
- 四 於日本之蹂躪朝鮮、神宗之命將救援、見朝鮮與中國、自古有休戚相關之誼、

參考

〔倭〕日本古名倭、至唐時乃更號日本、
〔日本西部〕今日本西海道、包九州全島、及對馬壹歧諸島、
〔明初之倭寇〕日本自受元兵之後、時有內亂、後分南北朝、南朝屢敗、爲北朝所併、餘黨無所歸、漂流朝鮮及中國海岸、遂成海寇、時值明初、方國珍張士誠、相繼誅服、諸豪亡命、往往糾合此項海寇、入寇山東濱海州縣、及浙閩沿海地方、
〔太祖命將防倭〕太祖命周德興往福建濱海四郡、相視形勢、衛所城不當要害

者、徙置之、民戶三丁取一以充戍卒、乃築城十六、增巡檢司四十五、得卒萬五千餘人、又命湯和行視浙東西諸郡、築城五十九、民戶四丁以上者、以一爲戍卒、得五萬八千餘人、分戍諸衛、海防大飭、

〔成祖時中日之國際〕成祖卽位、遣使以詔諭日本、永樂元年、日本貢使達寧波、旋至京、上其王源道義（卽日本大將軍足利義滿）表及貢物、帝厚禮之、封爲日本王、賜冠服、後屢貢獻、輒有賞賚、六年、源道義子源義持（卽日本大將軍足利義持）來告父喪、賜諡恭獻、勅義持爲日本國王、

〔令日本王嚴捕倭寇〕永樂二年、對馬壹歧諸島賊、掠濱海居民、諭源道義捕之、道義發兵、盡殲其衆、繫其魁二十人以獻、六年、海上復告倭警、遣官諭義持勦捕、八年、義持獻所獲海寇、

〔沿海稍安〕道義父子雖嚴捕、寇仍不絕、永樂十七年、都督劉榮大破倭於望海塢（今奉天金州廳東南）倭始不敢大爲寇、

〔世宗時之倭寇〕成祖而後、世有倭寇、至世宗時、日本諸道爭貢、大掠寧波沿海

郡邑因罷市舶（市舶司掌番商事）番貨至，私主商家，商家資其直，改主貴官家，資更甚，倭積憤大掠。

〔內奸〕倭之入寇也，內地奸人互相交結，爲之鄉導，如汪直、徐海、陳東、麻葉之徒，皆華人，妻子宗族田廬皆在籍，有司不敢問，浙撫朱執至，捕通番者九十餘人，悉誅之，其黨大譁，賄陷執，執自殺，寇氛益熾，大抵真倭十之三，從倭者十之七。〔被禍地方〕江蘇、浙江之大半，福建之福（今閩侯府）興（今興化府）漳（今漳州府）泉（今泉州府）四郡，廣東之潮（今海陽等九縣及南澳廳）廣（今南海等十四縣）雷（今海康等三縣）廉（今合浦二縣）瓊（今瓊山等八縣）一帶。

〔戚繼光〕世登州衛（今山東登州府）指揮僉事，繼光幼倜儻，負奇氣，家貧，好讀書，通經史大義，以戰功著，有練兵實紀行於世。

〔俞大猷〕晉江（今福建泉州府）人，少好讀書，擊劍，由武舉起家，以知兵稱，與戚繼光齊名。

〔繼光之破倭〕繼光於浙閩一帶，擊倭屢有功，迨嘉靖四十二年，督浙兵赴閩，與俞大猷等合擊倭於平海衛（今興化府）大破殲之，斬首二千二百級，墜崖溺水死者無算，福州以南諸寇悉平。

〔大猷之破倭〕世宗時老成宿將，以大猷爲稱首，嘗於江浙間屢創倭，功爲權臣所掩，大猷忠誠許國，不之校，平海衛之役，功次戚繼光，後又屢破倭於粵閩地方。

〔穆宗時倭寇始平〕穆宗時倭亦時有侵犯，然不如前時之熾盛，大致平靖。

〔神宗〕名翊鈞，穆宗第三子，在位四十八年。

〔平秀吉〕原爲日本薩摩州人之奴，雄健驍捷，有口辯，關白（日本大臣名號）信長出獵遇之，大見信任，屢立大功，已而信長爲其下所殺，秀吉誅之，因自稱關白。

〔秀吉勢強〕秀吉既爲關白，益治兵，征服諸將，統一國內，威勢甚盛。

〔蹂躪朝鮮〕秀吉遣將行長、清正等，將舟師數百艘，由對馬島渡海，朝鮮以承平

日久，不諳戰事，望風四潰，全境失陷，王李昫出奔，日人放兵淫掠。

〔明援朝鮮〕李昫遣使絡繹告急，神宗命祖承訓赴援，與倭戰于平壤（今朝鮮平安道之首府），城外大敗，承訓僅以身免。

〔明封秀吉〕承訓既敗，更以宋應昌爲經略，李如松爲提督，統兵討倭，時陝隴方有河套餘寇，朝鮮事起，兵部尙書石星計無所出，乃募能說倭者，送之如松麾下，未幾，如松大捷於平壤，朝鮮所失四道並復，窮追致敗，於是封貢之議起，議成，日兵去朝鮮京城，還所俘王子，冊秀吉爲日本國王。

〔日兵不退及其解兵〕封冊至日本，冊文不滿秀吉意，和議遂破，日兵復入朝鮮，神宗更以邢玠爲經略，麻貴爲大將軍，率水陸兵往救，交戰歲餘不決，諸將圍清正不克，久之秀吉死，諸倭揚航盡歸，朝鮮患始平，東南乃安枕。

第十二 滿洲之興

本文 明初於遼東東境置建州衛，分授各部長以職，世奉命令於朝，其人民大抵爲女真族，金人之遺裔也。建州衛之中，有滿洲部，部長努爾哈赤，姓愛新覺

羅氏，以兵滅諸部落，勢日強，明神宗欲以恩懷滿洲，授爲龍虎將軍，歲賜金帛，當是時，海西衛諸部方服屬於明，懼滿洲之強，聯合大軍伐之，悉爲所敗，遂滅海西，降福餘，奄有吉林及東蒙古之地，稱滿洲皇帝，旋敗明兵，取遼東，都於瀋陽，天是卽清太祖也，其子太宗繼之，蒙古小王子及俺答之後，皆爲所滅，又南降朝鮮，北定黑龍江，東撫庫頁島，因建國號曰清，准備

一 懸東三省地圖於壁，指示之曰：此爲何地，此吾中華民國領土之一部分也，南部濱海爲奉天，奉天之東北爲吉林，吉林之西爲黑龍江，統名之爲東三省，又稱滿洲。

二 汝曹知滿洲歷史之所由來乎，其一以其地之人種，爲吾中華民族中之滿洲族，其二以其爲前清之根據地，當時曾建滿洲爲國號，今則完全交付於民國，汝曹其注意。

三 汝曹知滿洲以前之歷史乎，滿洲以前，若周，若秦，若漢，若魏，若晉，若隋，若唐，

若元其地均爲吾國所有，卽明代亦然，故滿洲爲吾先民世守之土地，汝曹其注意。

教授事項

(甲) 時間分配 本課分二時

第一時 明初於吉林東部至歲賜金帛

第二時 建州衛之西至建國號曰清

(乙) 內容提示

一 於建州衛各部之世奉命令，見中國之統一滿洲，由來已久，現由民國繼續統治，尤宜互相結合，永固邦基。

二 於清太祖之崛起吉林，清太宗之兼併各地，見滿族確有尙武之精神，現宜奮此精神，以共衛民國。

參考

〔建州衛〕地在今遼瀋以東，明初於吉林地方，設都司，領衛一百八十四，建州其

一也。

〔分授各部長以職〕永樂間仿唐羈縻之制，分建衛所，衛設指揮使，所有千戶百戶之別，皆隸於都司，官多世襲，其軍士亦父子相繼，而建州左右兩衛皆置都督等官。

〔建州衛人民〕女真自阿骨打建國爲金，厥後金亡，（並詳前）元於其地分設萬戶府，其遺族散居松花江南北，各仍舊俗，從事射獵，沿至明代，部衆寢繁。

〔滿洲部〕建州衛內分兩部，一爲長白部，曰納殷，曰珠舍哩，曰鴨綠江，屬之，謂之左衛，一卽滿洲部，曰蘇克素護河，曰渾河，曰完顏，曰棟鄂，曰哲陳，屬之，謂之右衛。

〔努爾哈赤〕赫圖阿拉（今奉天興京府）人，其先世世爲建州右衛都督。

〔姓愛新覺羅〕遼金之季，有名布庫里雍順者，相傳爲天女所生，天女錫之姓曰愛新覺羅，是爲努爾哈赤之始祖，據滿洲語謂金爲愛新，可爲金源同派之證，（一說覺羅爲趙爲金地之趙姓，蓋自宋室北遷後，漢族與滿族血統參互不

可考已)

〔滅諸部〕先是明總兵李成梁征討叛部努爾哈赤之祖及父，在圍城中城破被殺，時爲明軍引導者，爲蘇克素護河人尼堪外蘭，努爾哈赤因以復仇名義攻殺之，遂次第攻服棟鄂、渾河、蘇克素護河、哲陳、完顏等部。

〔明神宗欲以恩懷滿洲三句〕尼堪外蘭走明邊，努爾哈赤遣使索之，邊吏執付尼堪外蘭，復以其祖父喪歸之，神宗賜勅及馬，封以爲龍虎將軍，兼建州左衛都督，又歲賜之銀八百兩，蟒緞十五匹，龍虎將軍，明朝正二品武階也。

〔海西衛〕當滿洲諸部之北，曰葉赫，曰哈達，曰輝發，曰烏拉，凡四國，統謂之扈倫部，明謂之海西衛，明倚哈達爲南關，葉赫爲北關，爲朔邊屏障。

〔福餘衛〕今內蒙古東部科爾沁、郭爾羅斯、杜爾伯特、札賚特、四旗之地，明初置福餘衛，以烏梁海酋長爲都指揮，後自立國。

〔聯軍之敗〕時扈倫四部、蒙古三部（科爾沁、錫伯、卦勒察）、長白二部、（珠舍哩、納殷）九部聯軍，合攻努爾哈赤，大潰於渾河北岸。

〔滅海西〕哈達以萬曆二十九年滅，輝發以三十五年滅，烏拉以四十一年滅，葉赫以四十六年滅，海西衛全亡。

〔降福餘〕科爾沁部，在蒙古諸部中，歸附滿洲爲最早。

〔奄有吉林及東蒙古之地〕太祖滅海西，得吉林西部，吉林東部之寧古塔以南，本爲太祖所有，寧古塔以東以北之地，即明之野人衛，亦次第爲太祖所有，其降附之科爾沁四旗，即今東蒙古之哲里木盟也。

〔稱滿洲皇帝〕努爾哈赤於萬曆四十四年稱帝，惟滿洲舊國，本在今吉林敦化縣地方，不過一小部落，太祖但因仍舊名耳。

〔敗明兵〕努爾哈赤既稱帝，廣儲蓄，利器械，盡收諸部精銳，至萬曆四十六年，決議伐明，明使經略楊鎬，率兵二十四萬出塞，四路進討，爲努爾哈赤所敗，損失無算。

〔取遼東〕熹宗（神宗孫）天啓元年，瀋陽遼陽（今奉天遼陽州）相繼陷，遼東三河等五十寨，及河東大小七十餘城，同時盡失。

〔都濟陽〕遼瀋既陷，努爾哈赤因遷都遼陽，至天啓五年，以瀋陽形勝之地，復自遼陽遷都之，是爲盛京。

〔清太祖〕太祖在位十一年而卒，諡太祖武皇帝，後改爲太祖高皇帝。

〔太宗〕名皇太極，在位十七年。

〔南降朝鮮〕朝鮮世受明冊封，楊鎬出師時，朝鮮曾出兵相助，及鎬敗，朝鮮將以殘兵降滿洲，努爾哈赤歸其部將十餘，貽書朝鮮王，不報，及太宗立，滿洲兵進攻朝鮮，朝鮮遣使謝罪，約爲兄弟國，已而太宗借舟師於朝鮮，朝鮮卻之，太宗復進兵攻之，朝鮮降，歲時貢獻表賀，均如明制。

〔北定黑龍江〕明初黑龍江，分爲五十八地面，羈屬都司，至明之晚年，並歸服於清太宗。

〔蒙古小王子之見滅〕蒙古小王子，即韃靼可汗，〔詳本冊第九課參考內〕自居插漢兒地後，亦曰插漢兒王子，即今之察哈爾部也，當努爾哈赤時，林丹汗當國，勢頗強，太宗數遣師襲其邊境，林丹汗以驕暴故，屬部分離，於明思宗崇禎


七年，爲太宗所擊走，死於青海附近。

〔俺答之後之見滅〕俺答曾孫卜失兔，亦婚於忠順夫人，勢寢弱，至崇禎元年，爲插漢兒所破，是即今之土默特部也，插漢兒既爲清所滅，土默特遂歸於清。

第十三 歐人來華

本文

當明成祖遣鄭和下西洋，直抵非洲東岸之際，歐洲葡萄牙王子，亦遣使往非洲西岸，欲至東方，後數十年，遂繞非洲而至印度，明武宗時，葡人始來廣東，及世宗之世，遂僑



歐人來華途程

居於澳門，既而西班牙人占呂宋，荷蘭人占台灣，各與中國通貿易，歐洲天主教士亦來中國，神宗時，利瑪竇入北京，自稱大西洋人，繼至者日衆，傳教於北京及各省，利瑪竇之來中國傳教也，并輸入歐洲之學術，一時甚歡迎之，大臣徐光啓首信其說，且傳受其學術，其後光啓爲相，明思宗亦嘗聽光啓之勸，而奉天主教焉。

準備

一 畫歐人來華程途圖於黑板，俾與書中圖比照，隨示之曰，此爲東半球地形略狀，東部偏北者爲亞洲，亞洲南之陸地，並海中島嶼爲海洋洲，西部偏北爲歐洲，歐洲之南爲非洲，就中以荷蘭距華爲最遠，西葡兩國次之，依圖中虛線，繞非洲之西南東各方面，以達印度，又由印度東南行，折而東北，則達於中國之澳門及北京，此爲當日歐人來華所經之程途也。

二 問三保太監下西洋，曾至何國，答曾至今埃及以南諸國。（見第五課參考內東西諸國爭來朝貢條）此不爲中國之盛事乎，答曰然，然則華人在當時

惜未能經至歐洲，下西洋之事，後亦不復有，惟歐人則精進不已，卒能繞非洲而來華，（因書歐人來華於黑板）

三 問三保太監何故下西洋，答在於宣布威德，（見第五課）然則當時歐人來華之故，汝曹可不知之乎，（因書通商傳教四大字於黑板）

教授事項

（甲）時間分配 本課分二時

第一時 當明成祖遣鄭和下西洋至傳教於北京及各省

第二時 利瑪竇之來中國傳教也，至而奉天主教焉

（乙）內容提示

一 於葡國王子之欲至東方，後數十年，遂繞非洲而至印度，見天下事有志竟成，不可中道而自阻。

二 於各國人之繼葡而來，見歐人惟能競爭，其優勝者，遂稱雄於世界。

三 於利瑪竇之輸入學術，見世界交通，實爲文明之導線，而閉關絕客之非計。

參考

「葡萄牙」今爲歐洲之民主立憲國，地在歐洲之西南部，濱臨大西洋，明人稱之爲佛郎機（歐洲古國會統一西歐故其時東方人稱西歐諸國爲佛郎機）

「葡萄牙王子」名亨利，葡王約翰第一之子，諳航海術，與同志數人，用儀器測量日出入及星纏度數，欲航東印度，以開貿易之便，當時歐人未有窮非洲南端者，或謂赤道直下，炎熱如烘，海水沸騰，陸上萬物枯灼，或曰海中妖魅成羣，不許旅客生還，人人危疑，不敢往探，亨利不信，決意裝船南發。

「遣使往非洲西岸」亨利遣人探非洲西岸，於明成祖永樂十八年，得馬德拉諸島，島在非洲西北海中，荊榛充塞，一望無垠，縱火焚之，歷七年始熄，墾而植之，獲利甚豐，亨利既有所得，益伸張航路，發舟人南進大洋，洪濤洶湧，繞岬而行，以明英宗正統五年，抵幾內亞，拾獲象牙黃金甚富。

「繞非洲至印度」亨利卒，葡王約翰第二繼其志，於明憲宗成化二十二年，遣舟南駛，達非洲極南，登陸而望，波濤山立，因名其地曰大浪山，又曰好望角，謂副

覓印度航路之望也，越十二年，爲明孝宗弘治十一年，葡王以馬努利，更遣舟繞喜望峯，踰好望角，達印度海岸，於是非印之航路通。

「葡人來廣東」印度海岸既發現，葡人東略之志益堅，遂設印度總督，掌貿易拓殖之務，復東南渡麻刺甲，遍測東方，以明武宗正德十一年，附帆船至中國，其翌年，至廣東，漸闢居留地。

「僑居澳門」澳門在今廣東香山縣南，明世宗嘉靖十四年，都指揮黃慶得葡人巨賄，爲請於上官，始以濠境（即澳門）爲通商之地，年科地租二萬金，其後三十三年，葡船有遭風濤者，以貢品被水爲辭，請於海道副使汪柏，乞地暴之，自是展境漸廣，迨神宗萬曆元年，復於澳門附近，築邊牆爲區畫，自是澳門遂歸葡領。

「西班牙」今爲歐洲之立憲王國，西界葡萄牙而濱大西洋，東南隔地中海與非洲相望，明史亦稱爲佛郎機，與葡萄牙混而不辨。

「西班牙人占呂宋」呂宋在閩海東南，距臺灣不遠，明初曾入貢中國，武宗正德

十六年，麥折倫（葡人仕於西班牙）駕艦東來，始抵其地。（繞西半球東行而來者）名曰腓力賓羣島，以當時西班牙王名腓力布也。迨穆宗隆慶五年，呂宋諸島遂爲西班牙人所據。

〔荷蘭〕亦歐洲之立憲王國，在歐西北隅，明人稱爲紅毛夷。

〔荷蘭人占臺灣〕先是明神宗以後，倭寇四散，其餘黨遂據臺灣。熹宗時，荷蘭人東來，至臺灣，求一互市地，弗許，誘以重幣，乃允。荷人於海邊築一臺，土人謂之紅毛樓，又於西南部築一城，俗呼爲紅毛城，拓地漸廣，以火礮攻倭寇餘黨，死傷頗衆，於是臺灣遂爲荷蘭有。

〔天主教〕天主謂上天之主宰，西史稱爲耶和華。天主教創於猶太人耶穌，以博愛爲宗旨，分新舊兩派，舊派名爲天主教，新派名爲耶穌教。

〔利瑪竇〕意大利（今爲歐洲立憲王國）人，爲彼國之博士。

〔入北京〕利瑪竇思敷教中國，乃航海東來，以明神宗萬曆九年抵廣東，凝神潛志，學習方言，大究心於中國文字，爲傳教之預備。二十九年，至京獻方物，神宗

召見便殿，假館授粲，給賜優厚。

〔自稱大西洋人〕時禮部言會典無大西洋，疑其真僞不可知，實則明代以西洋爲中國海以西之統稱，歐洲更在其西，故利瑪竇用大西洋之名以自表也。其後葡萄牙亦襲此稱，故至今我國人猶稱葡萄牙人爲大西洋人。

〔繼至者日衆〕踵利氏而至中國者，如龐迪我、如熊三拔、如陽瑪諾、如龍華民、如羅雅谷等，皆其著者也。

〔利瑪竇輸入歐洲學術〕如天文地理算學製造之類皆是。

〔土人之歡迎〕利瑪竇和易近人，誨人不倦，意專行教，不求祿利，其所著書，多華人所未道，所至受歡迎。

〔徐光啟〕上海（今江蘇上海縣）人，萬曆三十二年進士。

〔光啟傳利氏之學〕光啟奉天主教，又從利氏學天文曆算火器盡其術。

〔光啟爲相〕光啟於思宗崇禎五年，以禮部尚書兼東閣大學士，入參機務，尋加太子太傅，進文淵閣，光啟雅負經濟才，有志用世，及柄用，年已老，值奸臣周延

儒溫體仁等專政，不能有所建白，未幾卒。

〔思宗〕名由檢，光宗第五子，熹宗之弟，熹宗卒，即位，在位十七年。

〔聽光啟之勸，奉天主教〕時遼事日亟，光啟勸以奉教，冀承天佑，正教奉傳（教會內書）內載絳州（今山西新絳縣）崇禎八年行文，有尊天祛邪云云，尊天者，尊天主也，又言上自聖天子，賢宰相，莫不敬禮之，宰相指光啟，天子指思宗也，至崇禎十四年，建寧縣（今福建建寧縣）示文，亦有遵明旨，褒天學云云。

第十四 東林黨人

本文

先是明太祖鑒於漢唐之季，宦官專權誤國，嚴禁預政，成祖漸任用之，嗣後諸帝，無不倚宦官爲耳目，縱其貪橫，爲明室最大之弊政。神宗之世，徧遣宦官徵稅，民間騷然，羣臣互相攻訐，不復留意於國事，顧憲成等講學於東林，蘇無錫縣議論時政，南北之士，慕而附之，聲勢頗盛，然忌之者亦衆，彼此競爭殊烈，神宗之孫熹宗在位，昏頑好戲，朝廷大權，悉歸宦官魏忠賢，捕東林黨人，刑戮甚慘，忠賢威權愈隆，爲之建生祠者，徧於全國，熹宗卒，弟思宗立，始誅忠賢，而國事

已無可爲矣。

準備

一 汝曹知黨人與國家之關係乎？黨人以愛國家故，故給合團體，講求政治，以期國家之進化，然往往不見容於專制之時代，蓋觀明代之東林。

二 黨人者，以改良政治爲目的者也，專制時代，既以政治不良故，產有黨人，復以黨人議及政治，不便專制故，遂成黨禍，然而黨禍既興，國禍未有不隨發者，蓋觀明代政府之對於東林，及東林以後之中國現狀。

教授事項

（甲）時間分配 本課以一時授完

（乙）內容提示

一 於明代諸帝之倚宦官爲耳目，遂爲滅亡之一大原由，見小人之不可任用，凡無國家觀念，國民道德之小人，之類於明代宦官者，均宜擯之。

二 於顧憲成等之議論時政，見其確有愛國之誠，忌之者是無國家觀念，是無

國民道德、此項人當視之爲國蠹、爲民賊、不得目爲反對之政黨、

三 於忠賢之株僇東林、其黨快意極矣、然自是國事已無可爲、則此項之株僇、不獨禍東林、卽忌之者亦適以自禍也、

參考

〔明太祖禁宦官預政〕太祖鑒前代之失、置宦者不及百人、後頒祖訓、乃定爲十有二監、及各司局、稍備員矣、然定制不得兼外臣文武銜、不得御外臣冠服、嘗鑄鐵牌置宮門曰、內臣不得干預政事、違者斬、

〔成祖漸任用〕成祖起兵逼江北時、內臣多逃入其軍、漏朝廷虛實、成祖以爲忠於己、而狗兒輩復以軍功得幸、卽位後遂多所委任、

〔成祖後諸帝之繼任〕其受害最鉅者、若英宗時之王振、憲宗時之汪直、武宗時之劉瑾、熹宗時之魏忠賢、皆逞其智巧、逢君作奸、考其禍敗、去漢唐不遠、凡出使專征、監軍分鎮、刺臣民隱事、諸大權、多爲此輩所操云、

〔神宗遍遣宦官徵稅〕神宗時鑛稅大興、又增設各省稅使、如天津店租、廣州珠

監、兩淮餘鹽、浙江福建廣東市舶、成都茶鹽、重慶（今四川重慶府）名木、湖口（今江西湖口縣）長江船稅、寶坻（今直隸寶坻縣）魚葦、及門攤商稅等、都邑關津、中使碁布、水陸行數十里、卽樹旗建廠、所至納奸民爲爪牙、肆行殺奪、又立土商名目、窮鄉僻壤、米鹽雞豕、皆令輸稅、中人之家、大半皆破、由是民不聊生、變亂蜂起、

〔羣臣之攻訐〕神宗時、小人好權趨利者、馳騫追逐、與名節之士爲仇讎、門戶紛然角立、其在廷正類、亦無深識遠慮、以折其機牙、而不勝忿激、交相攻訐、馴致亡國、此風未熄、故論者謂明之亡、實亡於神宗、

〔顧憲成〕無錫（今江蘇無錫縣）人、官吏部員外郎、以言事忤神宗、削籍歸里、旣廢而名益高、學者稱爲涇陽先生、

〔憲成等講學東林〕東林書院、在今無錫城內、本宋楊時講道處、憲成與弟允成倡修之、偕同志高攀龍錢一本薛敷教史孟麟于孔兼輩、講學其中、

〔議論時政三句〕憲成嘗曰、居水邊林下、志不在世道、君子無取焉、故其講習之

餘往往諷議朝政、裁量人物、朝士慕其風者、多遙相應和、

〔熹宗〕名由校、光宗〔神宗子〕子、在位七年、

〔魏忠賢〕肅寧（今直隸肅寧縣）人、少無賴、與羣惡少博不勝、爲所苦、恚而自宮、變姓名曰李進忠、其後乃復姓、賜名忠賢、

〔捕戮東林黨人〕閹黨顧秉謙、魏廣微等、籍東林諸人姓名、授忠賢、以次斥逐、殺戮禁錮、善類爲之一空、

〔魏忠賢生祠〕時中外臣工、畏忠賢毒酷、浙江巡撫潘汝楨、疏請建忠賢生祠于西湖、自是諸方效尤、幾遍天下、

〔思宗誅忠賢〕思宗素稔忠賢惡、甫卽位、卽罷其黨崔呈秀、嘉興貢生錢嘉徵、疏陳忠賢十大罪、思宗遂放忠賢于鳳陽、榜其罪示天下、忠賢自縊死、詔戮其屍、〔國事已無可爲〕時遼事日急、各省旱蝗相屬、盜賊蜂起、不可收拾、

第十五 明思宗

本文

思宗卽位之初、以滿洲勢盛、使袁崇煥守遼西、滿洲縱反問、謂崇煥通敵、

思宗下獄殺之、邊事益壞、長城以外、悉爲滿洲所有、自滿洲稱兵以來、朝廷征勦無已時、需餉甚鉅、迭次加賦、民力已困、至是、陝西大饑、民皆起爲盜、李自成張獻忠勢最大、官兵莫能支、自成遂陷北京、思宗自縊死、自成稱大順皇帝、張獻忠則入四川、稱大西國王、自成獻忠、皆殘暴好殺、所至焚掠、民物爲墟、獻忠之入四川、誅殺尤酷、川中人迹殆絕、滿洲乘機入關、自成獻忠、并爲所滅、準備

一 問宋高宗之世、中原垂復而終不復、何以故、答以殺岳飛故、今有將略略同於岳飛、而亦被冤殺者、試爲汝曹述之、（因書袁崇煥於黑板）

二 問唐之季世、有慘無人道之民賊、汝曹知此賊爲誰、答黃巢、今有慘倍黃巢、爲人類之公敵、斷送有明之國祚者、汝曹知之乎、（因書李自成張獻忠於黑板）

教授事項

（甲）時間分配 本課以一時授完

(乙) 內容提示

- 一 於思宗之輕聽反間，致誤邊事，見政府不可無知人之明。
- 二 於明季之民起爲盜，一方面當責政府之不善撫綏，一方面當責人民之毫無程度，故明之亡，不獨亡於明之政府，實兼亡於明之國民。

參考

〔袁崇煥〕東莞（今廣東東莞縣）人，官邵武（今福建邵武府）知縣，以邊才被擢，督師薊遼。

〔守遼南〕遼西，今奉天遼河以西地，崇煥初以寧前道守寧遠（今奉天寧遠州），曾戰卻清師，及爲督師時，清太宗大舉攻遼西，崇煥令諸將背城據濠，列車營火器以拒敵，清軍佯退誘之，明兵堅壘不動，清軍退。

〔滿洲縱反間〕清太宗以遼西有備，憎崇煥殊甚，乃連合喀喇沁等部（今內蒙古東部），使爲鄉導，由喜峯口毀邊牆入，陷遵化（今直隸遵化州），復越薊州而西，進薄京城，崇煥以兵入援，清太宗川反間計，謂與崇煥有密約，令所獲明

宦官知之，陰縱使去，明思宗因下崇煥於獄，後遂磔之於市。

〔饑民皆起爲盜〕時陝西大饑，府谷（今陝西府谷縣）人王嘉允倡亂，復以裁驛卒、山陝游民、仰驛糶者，無所得食，羣起爲盜。

〔李自成〕米脂（今陝西米脂縣）人，時安塞（今陝西安塞縣）人高迎祥等，嘯聚饑民，剽掠郡縣，號闖王，自成聚衆依迎祥，號闖將。

〔張獻忠〕延安（今陝西延安府）人，高迎祥既起，獻忠亦合徒衆，據十八寨，自稱八大王。

〔自成陷北京〕自成以崇禎四年爲寇，東西馳突，至崇禎十七年，由西安東下，陷太原，破寧武關（今山西寧武縣），長驅下大同宣府（今直隸宣化府），從居庸關入，守將及監軍太監均降於賊，賊逼京師，太監曹化淳開門納賊，城遂陷。〔思宗自縊死〕京城既陷，思宗出宮，登煤山，望見烽火徹天，歎息曰：「苦我民耳！」徘徊久之，還宮，命后妃自盡，復登煤山，書衣襟爲遺詔，言無面目見祖宗，自去冠冕，以髮覆面，以帛自縊於山亭。

〔自成稱大順皇帝〕自成以崇禎十七年稱王於西安，國號大順，既陷北京，因以是年四月稱帝於武英殿。

〔獻忠入四川〕獻忠以崇禎三年爲寇，屢蹶屢起，至崇禎十七年陷成都。

〔獻忠稱大西國王〕獻忠既有全蜀，遂自號大西國王，修蜀王府居之。

〔自成之殘暴〕自成性猜忍，以殺人爲戲，凡攻城迎降者不殺，守一日殺十之三，二日殺十之七，三日屠之，凡殺人束屍爲燎，謂之打亮，城將陷，步兵萬人環堞下，馬兵巡徼，無一人得免。

〔獻忠之殘暴〕獻忠狡獪嗜殺，一日不殺人輒悒悒不樂，嘗陷武昌，錄男子二十以下十五以上爲兵，餘皆殺之，由鸚鵡洲至道士沱，浮觴蔽江踰月，人脂厚累寸，魚鱉不可食。

〔四川人跡殆絕〕獻忠在川，詭開科取士，集於青羊宮，盡殺之，筆墨成丘塚，坑成都民於中園，殺各衛籍軍九十八萬，遣諸僞將分屠各府州縣，將卒以殺人多少敘功，共殺男女六萬萬有奇（此數恐不實，特甚言其多耳），會諸郡義兵並

起，

獻忠憤怒，誅殺益毒，川中人煙闕寂，幾無噍類。

〔自成之末路〕自成爲清兵所擊，棄京師，奔西安（今陝西省治），既而清兵破西縣，率二十騎略食於九宮山（在今湖北通山縣南），爲村民所困，不能脫，自縊而死。

〔獻忠之末路〕獻忠以川中民盡，謀窺西安，盡焚成都宮殿廬舍，夷其城，率衆出川北，又欲盡殺川兵，其將劉進忠聞之，率一軍逃，會清兵至漢中（今陝西南鄭縣），進忠因請爲鄉導，至鹽亭（今四川鹽亭縣）界，大霧，獻忠曉行，猝遇清兵於鳳皇坡，中矢墜馬，蒲伏積薪下，清兵擒出，斬之。